

ROMANOS

Pablo, Roma macārã Cristore ca t̃uo ññj̃eerãre owa cojogu, ména Romar̃re waatig̃ra c̃jare owa cojoui. “Biig̃ra Ẽspãar̃ waagu, yu ãa amet̃a waarucu,” c̃ ca ãirije niip̃ra, “Too cãare yu waarucu” c̃ ca ãi t̃goeñ̃aricarop̃re.

Ate queti Pablo c̃ ca owariquea, Galacia macārãre c̃ ca owa cojorique mena maquẽra nii. Cristore ca t̃uo ññj̃eerã, “O biri wãme ca tii niipe nii Cristore ca t̃uo ññj̃eerã mani ca niijata,” paio c̃ ca ãi wede owarique nii. C̃ ca owa cojorucure birora “To biro ca biig̃ra m̃jare yu owa cojo,” ãi wede yapano, añu doti cojo, ñucã “Añu majuropeecã” c̃ ca ãi juu buerije mena, to biri “Atere ãima ãig̃ra m̃jare yu owa cojo,” c̃ ca ãirije mena, owa j̃omí (1.1-17).

To biro ãi yapano, (1.16-17) “Añurije Queti ate maquẽ nii,” ãi wedecã cojo, ñucã c̃ ca wede majio owa cojopere wede majio cojog̃ra: “Judíos, judíos ca niitirã, to biri bojoca niipetirã̃ra, ñañaro c̃ja ca biiboriquere amet̃a majima,” ãi wede majiomi. Ñucã “Jesucristore mani ca t̃uo ññj̃eerije j̃ori mena wado mani ca ñañarijere manire amet̃enemi Ëm̃areco Pac̃,” ãi wede Añurije Queti,” ãi wede majio ññna waami (1.17).

“Niipetirã̃ra, judíos, judíos ca niitirã, ñañarije ca tiirã wado mani niicã, tee tiirã ñañaro ca bii yaiparãra mani niicã, to biri ñañaro mani ca biiboriquere ca amet̃aparã mani nii,” ãi wede majiomi (1.18–3.20). Atere c̃ ca wedejata: “Jesu-

crístore mani ca t̃uo ññj̃eejata, ñañarije mani ca tiiriquere manire amet̃ene majimi; ñañaro mani ca biiboriquere manire amet̃ene majimi; ñucã c̃u mena macãrã mani ca niiro manire tiimi Æm̃areco Pac̃u,” ïi wede majiog̃u ïimi (3.21–4.25).

“To biro Æm̃areco Pac̃u manire c̃u ca tiiro macã, wãma catirique mani c̃uo Jesucristo mena nii eama ïirã,” ïi wedemi. To biro ïicã, doti c̃uurique maquẽre, “O biro biip̃a bojoca menare,” ïi wede yapano, bojoca ñañarije c̃uja ca tii niirijere Æm̃areco Pac̃u c̃u ca amet̃ene bojaro jirop̃ara yua, c̃u ca cati niirije pea Æm̃areco Pac̃u ỹu Añuri Yeri c̃u ca doti niirije peere ca tii ññj̃eerije nii ea, ïi wedemi (caps. 5–8).

Israel yaa pooga macãrã niipetirã jañurip̃ara añurije quetire c̃uja ca t̃uo ññj̃eetiro macã, judío niiri Pablo c̃u ca t̃ugoeña pairiquere wede. Tee tiig̃u Pablo, Æm̃areco Pac̃u c̃u yaa pooga macãrãre junag̃u méé c̃u ca biirijere, niipetirãp̃are c̃u ca ïa maiore birora ñucã jiro c̃uja cãa Jesucristore c̃uja ca t̃uo ññj̃eepere wedemi (caps. 9–11).

Jesucristore ca t̃uo ññj̃eerã c̃uja ca biirique cuti niirije maquẽre wedemi anora. Ameri mairique maquẽre, Æm̃areco Pac̃ure tii nuc̃u b̃oriquere, uparã c̃uja ca dotirijere t̃uo ññj̃eeriquere, to biri mani jaarã mena añuro niiriquere, wedemi, Jesucristo c̃u ca biirica wãmere t̃ugoeñari (12.1–15.13).

“O biri wãme nii Cristo mena ca niirã, c̃uja ca niiri wãme,” ïi, ameri mairique maquẽre wede majio yapano cojomí. To biri ïicã, queti owa yapano cojog̃u, “C̃ujare añu dotiya,” ïirique mena owa

yapano eami Pablo (15.14–16.27).

Roma macãrãre Pablo cũ ca queti owa cojorica pũuro

Añu dotirique

¹ Yũ Pablo, Cristo Jesús yeere ca paderi majũ, cũ yee quetire ca wede yujupũ cũ niijato ñigũ cũ ca jũoricũ, Æmũreco Pacũ yee añurije quetire ca wedepũ cũ ca ami dica wooricũ, mũjare yũ añu doti.

² Mee, cũ yeere wede jũgueri maja menapũra añurije queti cũja ca owariquerũ, “To biro yũ ti-irucu,” ñi cũucãquĩupi Æmũreco Pacũ.

³ Tee añurije queti, mani Wiogũ Jesucristo bojocũre biro ca baũaricũ cũ ca niirije peera, David yaa puna macũ cũ ca niirijere wede.

⁴ Añuri Yeri ca ñañarije manirã cũja ca niiro ca tiigũ mena peera, cũ ca doti tutuarije mena Æmũreco Pacũ Macũ nii eaupi, ca bii yairicarã watoare cũ ca cati tuari tabe mena.

⁵ Jesucristo jũorira, Æmũreco Pacũ cũ wãmere cũja ñi nũcũ bũojato ñigũ, añurije quetire wede yujuri majũ niiriquere mani ca bũa earo jãare tiĩwi, bojoca poogaari niipetirãpũra cũre tũo nũnũjee, cũ ca ñiire biro tiĩ, ca tiirã cũja niijato ñigũ.

⁶ Mũja, Jesucristo yaarã cũja niijato ñigũ Æmũreco Pacũ cũ ca jũoricarã cãa, cũja menara mũja nii.

⁷ Mũja niipetirã Æmũreco Pacũ cũ ca mairã, cũ yaarã cũja niijato ñigũ cũ ca jũoricarã Roma ca niirãre yũ owa cojo. Mani Pacũ Æmũreco Pacũ, Wiogũ Jesucristo, cũ ca añu majuropeerije, jĩcãri cõro añuro niiriquere, mũjare cũ tiicojojato.

Pablo Romapɯ cã ca ãa yujugɯ waarɯgarique

8 Ca nii jɯori tabere, Jesucristo jɯoripɯ, mɯja niipetirã yee jɯori, yɯ ʃmɯreco Pacɯre, “Añu majuropeecã” yɯ ãi, díamacũ mɯja ca tɯo nɯcũ bɯorijere niipetiri taberipɯ macãrã cãja ca wede bato nɯnɯa waarije ca niiro macã.

9 ʃmɯreco Pacɯ, yɯ ca cati niirije niipetiropɯ mena, cã Macũ yee añurije quetire yɯ ca wede boja niigɯ niimi, to birora mɯjare yɯ ca tɯgoeña cã niirijere ca majigɯ.

10 Mɯja pɯtopɯ yɯ ca ãagɯ waapere, ʃmɯreco Pacɯre “Mɯ ca boorije to ca niijata, toopɯ yɯ ca waaro yɯre tiya,” yɯ ãi juu buerucu to cãnacã tiira.

11 Jĩcã wãme mɯja ca yeri tɯgoeña bayipere mɯjare wede majiorɯgama ãigɯ, bɯaro mɯjare yɯ ãarɯga.

12 Añuro petira díamacũ mani ca tɯo nɯcũ bɯo niirijere ameri wede ɯjea nii, tɯgoeña tutua, mani ca ameri tiipere ãima ãigɯ.

13 Yɯ yaarã, atere mɯja ca majiro yɯ boo: Paɯ tiiri “ca ãagɯ waape niicu,” ãi pacagɯ, yɯ waa majiti, paɯacã yɯre bii camotacã niirucu. Ape poogaari macãrã judíos ca niitirã, Jesús're ca tɯo nɯnɯjeerã cãja ca niiro yɯ ca tiiricarore birora, mɯja mena macãrã Jesucristore cãja ca tɯo nɯnɯjeero tiirɯgama ãigɯ, yɯ waarɯgami.

14 “To biri bojoca cõrorena griego ca niirã, griego ca niitirã cãare, yɯ ca wedepe dɯjacã mena,” yɯ ãi tɯgoeña.

15 To biri mɯja Roma macãrã cãare, bɯaro mɯjare Jesús yee añurije quetire yɯ ca wederɯgarije nii.

Añurije queti ca tii tutuarije

16 Añurije queti Æmareco Pacu cũ ca yeri tutuarije ca niirije, teere ca tæo nænñjeerã niipetirãre cũja ca ametuaro ca tiirijere* wedegu yu boboti, ca nii jæori tabere judíos, ñucã judíos ca niitirã cãa, cũja ca ametuapere.

17 Tee añurije queti pea, mee tĩrumapera díamacũ tæo nucũ bæorique jæorira Æmareco Pacu añurã cũ ca tiiriquera, mecũ cãare ñucã díamacũ tæo nucũ bæorique jæorira añurã manire cũ ca tiirijere wede majio, Æmareco Pacu wederique: “Añugua, díamacũ cũ ca tæo nucũ bæorije jæorira catirucumi,” ca ñirore birora.†

Æmareco Pacu bojoca menare cũ ca ajiarije

18 Niipetirã bojoca ñañarã, ñañarije cũja ca tiirije mena, Æmareco Pacu yee majiriquere, díamacũ ca niirijere, ca tii camota niirãre, amareco tutipu niigera ñañaro cũjare cũ ca tiirije mena cũ ca ajiarije ññomi Æmareco Pacu.

19 Æmareco Pacu yee maquẽ cũja ca majipere añuro majima, cũ majuropeera cũjare majioui.

20 Æmareco Pacu ca ñaña manigu cũ ca nii pacaro, cũ ca tiiriquerena ñari, cãre majirique nii. Ati yepare cũ ca tiirica tabe menapera, Æmareco Pacura cũ ca niirijere, cũ ca doti tutuarije ca peti nucãtirijere, ña majirique nii. To biri ca ñañarã, “Majitima ñirã, to biro jãa biiwu,” ñi majitima.

21 Æmareco Pacure ca majirã nii pacarã, Æmareco Pacure birora cãre ñi nucũ bæo, “Mu añu majuropeecã,” cãre ñi, ñitima. Ñitirãra ñañarije pee wado tugoeña, ñañarije cũja ca tugoeñarijera

* **1:16** Wedegu yu boboti. † **1:17** Hab 2.4.

ca naitīaropu ca niirāre biro, cāja ca nii yai waaro cūjare tiicā.

22 “Ca majirā jāa nii,” īi pacarā, ca majitirā jeeñacā yai waama.

23 To biro ca biirā niiri, Umureco Pacu to birora ca caticōa niigu cū ca tutuarijere, bojocu yoaro ca catigure biigu pee weeri, ñucā ca wuarā, waibucurā bapari dūpori ca dūpori cutirā, añaa, pinoare biirā cāja ca wee jeeñoricarā peere, tii nūcū buo wajoama tee cāare.‡

24 Tee juori Umureco Pacu, cāja yeripu ñañarije cāja ca tiiruga tugoeñarije pee, cūjare cūucūpi. To biri cāja majuropeera boborije ameri tiicā yai waaupa.

25 Umureco Pacu yee díamacū ca niirijere tii nūñjeericaro unora, ca bii ditorije peere tii nūñjee, Umureco Pacure cāja ca tii nūcū buopa tabe unora, cū ca tii jeeñorique peere tii nūcū buo, tii niupa, Umureco Pacu teere ca tii jeeñoricu to birora baja peo nūcū buocōa niiricu peere tii nūcū buotirāra. To biro to biijato.

26 To birira Umureco Pacu, boborije cāja ca tiirije peere cāja ca tiiro cūjare tiupi. Nomia menapura añuro manū cuti niirica wāmere tiitirāra, cāja majuropeera, nomia wado ameri manū cuti, tii wajoa niupa.

27 Umua cāa to birora nomia mena añuro nūmo cuti niirica wāme cōrora tiitirāra, cāja majuropeera, umua wadora ameri tii epe niirucuupa, cāja upari ca boorore biro aperā mena cāja ca tiiruga ametuarije ca niiro macā. Ca tiiya manirijere cāja ca tiirije juori cāja

‡ 1:23 Dt 4.16-18.

majuropeera cūja upu menara cūja ca ñañarije wapare ñañaro tamoupa.

28 Umureco Pacure majirugati, ñañarije wado tugoeña, cūja ca biirije juori, cū pea cūjare camotaticāupi, ca tiitipe uno peere cūja tii niijato iigu.

29 To cānacā wāmera ñañarijere tiicāma: ñañaro cūja ca tugoeñarije, apeye unore cūja ca ĩa ugorije, aperāre ñañaro cūja ca tiiruga tugoeñarije, ca bojoca jīarā, ca ĩa tutirique pairā, ca ajia pairā, ca ameri quēe pairā, ca ĩi dito pairā, ca wede pairā,

30 aperāre ñañarije ca ĩi wede coterā, Umureco Pacure ca junarā, “Ñañaro jāa tiibocu” ca ĩi bojoca catitirā, ca nii majuropeerāre biro ca tugoeñarā, ñañarije ca ĩi jeeñorique pairā, cūja pacure ca ametene nacārā,

31 ca tugoeña bojoca catitirā, cūja ca ĩi rore biro ca tiitirā, ca bojoca ĩa maitirā, ca ĩa boo pacatirā, niima.

32 Mee Umureco Pacu, “To biro ca tii niirā, ñañaro biirica tabepu ca bii yaiparā niicārā biima,” cū ca ĩi cūriquerē añuro majima. Teere maji pacarā, to birora tiicā nūnua waa, cūja ca tiirijere ĩa cōori, cūjare biro ca tii nūnūjeerā cāare “Añu majuropecā,” ĩima.

2

Umureco Pacu ca niirore biro cā ca ĩa bejerije

1 To biri mu, no ca boogu, aperāre, “To biro biima,” ca ĩi ĩa bejegu, “Cūjare biro yu biiti,” mu ĩi majiti. Aperāre, “To biro biima,” ĩi ĩa bejegu mu majuropeera ñañaro mu bii yaicā, cūjare birora ca tiigu niiri.

² Ɛmureco Pacu, ñañarije ca tiirãre ñañaro cū ca tiijata, díamacūra* cū ca tiirijere mani maji.

³ Mɛ, aperãre, “To biro biima,” ca ñi ña bejegɛ, cūjare birora ca tiigɛ nii pacagɛ, “Ɛmureco Pacu ñañaro cū ca tiirijere yɛ duticãrucu,” ¿mɛ ñi tɛgoeñacãti?

⁴ Ɛmureco Pacu cū ca añu majuropeerijera mɛ ca tɛgoeña wajoaro ca tiirɛgarijere majirɛgatima ñigɛ, Ɛmureco Pacu, ca añu majuropeegɛ niiri, ca tɛgoeña bayigɛ niiri, ca boo paca ñagɛ niiri, añurije ca peti nɛcãtirije cū ca tiicojorijere mɛ juna.

⁵ Ca bii ametɛene nɛcãgɛ niiri, Ɛmureco Pacu peere mɛ ca tɛo nɛnɛjeerɛgatirije jɛori, ñañaro tamɛorica rɛmɛ, ca niimore biro Ɛmureco Pacu cū ca ña bejeri rɛmɛ ca niimore, mɛ majuropeera ñañaro mɛ ca tamɛopere bɛaro jañuro mɛ tii bui cati nɛnɛa waa.

⁶ To cãnacãrãrɛrena, cūja ca tiirica wãmeri ca niimore biro ña cõoñari, ñañarije ca tiiricarãra ñañaro tii, añurije ca tii niiricarãre añuro cūjare tii, tiirucumi.†

⁷ Ca añu majuropeerije, ñi nɛcū bɛorique, to birora caticõa niiriquere, amarã, añurijere to birora ca tiicõa niiricarã peera, to birora caticõa niiriquere cūjare tiicojorucumi Ɛmureco Pacu.

⁸ Cūja ca bii ametɛene nɛcãrije mena, díamacū ca niirijere juna, ñañarije peere tii, ca tiirã, Ɛmureco Pacu, ajiarique mena ñañaro cū ca tiirijere tamɛorucuma.

⁹ Niipetirã ñañarije ca tiirã, ñañaro tamɛo, tɛgoeñarique pai, biirucuma. Ca nii jɛori tabere

* 2:2 Cū wederique ca ñiire biro cū ca tiirijere mani maji. † 2:6 Sal 62.12; Pr 24.12.

judíos, ñucã judíos ca niitirã cãa, to birora biirucuma.

¹⁰ To ca bii pacaro, niipetirã añurije ca tiirã peera, ca añu majuropeerije, ñi nũcũ b̃oriquẽ, añuro niirique, cãjare tiicojorucumi Ƴm̃areco Pacũ; judíos're tiicojo j̃uo, ñucã judíos ca niitirã cãare to birora tiirucumi.

¹¹ Ƴm̃areco Pacũ menara bojocare cã ca ña dica woorije mani.

¹² Niipetirã Moisés cã ca doti cũuriquere maji-tirãra ñañarije ca tiiricarã, ñañarije cãja ca tiirique j̃uorira ñañaro biirica tabepũ waarucuma. Moisés cã ca doti cũuriquere ca majirã nii pacarã ñañarije ca tiirã, doti cũurique ca ñiire biro ñañaro tii ecorucuma.

¹³ Moisés cã ca doti cũuriquere cãja ca t̃orije j̃uorira, “Añurã niima,” cãjare ñitimi Ƴm̃areco Pacũ. Doti cũurique ca ñiire biro ca tiirã peere, “Añurã niima,” cãjare ñi ñami.

¹⁴ Judíos ca niitirã, doti cũurique ca c̃otirã nii pacarã, cãja majuropeera cãja ca tii niirijere doti cũurique ca ñiire biro cãja ca tiijata, cãja majuropeera doti cũurique niicãma.

¹⁵ To biro cãja ca bii bojoca c̃uti niirijera, cãja yeripũ doti cũurique ca niirijere ññoma. Teera cã ca t̃goeña bojoca cati niirijep̃ure cã ca majiro tii, ñucã cã ca t̃goeña niirijera cãre wede majio, teera cãre wedejãa buiyee, tiirucu,

¹⁶ Jesucristo j̃uori, j̃cãrãra majiriquere añurije queti yũ ca wederije ca ñiire biro Ƴm̃areco Pacũ cã ca ña bejeri r̃mũ ca niire.

Judíos, to biri doti cũurique

17 “Jãa judíos, doti cūuriquere ca cʉorã, Ƴmureco Pacu yaarã,

18 cū ca boorijere ca majirã, doti cūurique jʉori añurije beje majiriquere ca bue majio ecorã,

19 ca ïatirãre biro ca niirãre ca jʉo waa majirãre biro ca tʉgoeña niirã, ca naitiaropu niirãre biro ca niirãre ca boe baterãre biro ca niirã,

20 ñucã, ca majitirãre ca wede majiorã, ca tʉgoeña bayitirã cãare ca bue majiorã, doti cūuriquerena, majirique, díamacū ca niirijere, ca cʉorã jãa nii,” mʉja ïi ʉjero bayi.

21 To docare mʉja, aperãre ca bue majiorã nii pacarã, ¿ñee tiirã mʉja majuropeera mʉja wede majio majititi? “Jee dutieto,” ca ïi buerã nii pacarã, ¿ñee tiirã mʉja jee dutirucuti?

22 Ñucã, “Ñee epeticãña,” ca ïirã nii pacarã, ¿ñee tiirã mʉja pea mʉja ñee epeti?† Cūja ca weericarãre ca junarã nii pacarã, ¿ñee tiirã cūjare ïi nucū bʉorica wii maquẽre mʉja jee dutirucuti?

23 “Moisés cū ca doti cūuriquere ca cʉorã niirã jãa bii,” ca ïi ʉjero bayirã nii pacarã, doti cūurique ca ïirore biro mʉja ca tiitirije mena Ƴmureco Pacure mʉja nucū bʉoticã.§

24 To birira Ƴmureco Pacu wederique o biro ïi: “Mʉja yee jʉorira, judíos ca niitirã, Ƴmureco Pacure ñañoaro cūre ïi tutima,” ïi.*

25 Moisés cū ca doti cūurique ca ïirore biro mu ca tii nʉnʉjeejata, jeyua quejero yapare wide taariquea ca wapa cʉtirijera niiro bii; tee ca ïirore

† 2:22 ¿“Mʉja nʉmoa, mʉja manʉ jũmʉa, ca niitirãpʉrena epericarã cʉtiticãña,” ca ïirã nii pacarã, mʉja epericarã cʉtiti? § 2:23 Ez 36.16-23. * 2:24 Is 52.5; Ez 36.22.

biro m̄ ca tii n̄n̄jeetijata, jeyua quejero yapare ca wide taaya maniḡure birora m̄ niic̄ã.

²⁶ To biic̄ãri, c̄ã jeyua quejero yapare ca wide taaya maniḡu nii pacaḡu, doti c̄ũurique ca ñirore biro ca tii n̄n̄jeeḡura, jeyua quejero yapare wide taaric̄are biro ñaric̄u niirucumi.

²⁷ C̄ã up̄ mac̄ã tabere ca wide taaya maniḡu nii pacaḡu, doti c̄ũurique ca ñirore biro ca tii n̄n̄jeeḡu pea m̄, doti c̄ũuriquere c̄uoc̄ã, m̄ jeyua quejero yapare wide taaric̄u niic̄ã, bii pacaḡu doti c̄ũurique ca ñirore biro m̄ ca tii n̄n̄jeetirije j̄ori, ñañaro m̄re tiirucumi.

²⁸ Judío niiriquea, jotoa wado biirique méé nii. Jeyua quejero yapare wide taarique c̄ã, jotoa wado tii niirique méé nii.

²⁹ Díamac̄ãra judío nii majuropeeriquea, mani ca t̄goeña niirijep̄u biirique nii. Ñuc̄ã jeyua quejero yapare wide taaric̄u peti niiriquea, yeri j̄añariquep̄u t̄goeña wajoarique nii, doti c̄ũurique c̄ãja ca owa tuurique j̄ori méé, Añuri Yeri j̄ori mani ca t̄goeña wajoarije nii. To biro ca biiḡu judío docare, Ëm̄areco Pac̄u c̄ãre ñi n̄c̄ũ b̄omi, bojoca méé to biro ñima.†

3

Ëm̄areco Pac̄u c̄ã ca añurije

¹ ¿To docare judío niirique mena, ñee peere nii amet̄ene n̄c̄ã, ñuc̄ã jeyua quejero yapare wide taariquea, ñee pee wapa c̄ati, to biiti?

² Pāu w̄ãmerip̄arena biic̄ã, ca nii j̄ori tabere judíos're c̄ã wederiquere c̄ãjare tiicojoui Ëm̄areco Pac̄u.

† 2:29 Gn 29.25.

³ ¿To docare yua, ʘmureco Pacua, jĩcãrã cū yee ca niitirije peere tii n̄n̄ujee, cãre cūja ca bii we-orora, cū ca ĩrore biro ca tiigu cū ca niirijere cū yerijãacãgajati?

⁴ ¡Biiticumi! ʘmureco Pacua, to birora díamacū ca niirije ca ĩrore biro tiicõa niimi, bojoca niipe-tirãpura ca ĩi dito pairã wado cūja ca niicã pacaro. O biro ĩi owarique nii:

“M̄ ca ĩirijere ‘Añuḡu niimi,’ ĩi eco, ñucã m̄re cūja ca wedejãajata cãare bii amet̄a n̄cãcã, m̄ biicãrucu,” ĩi.*

⁵ Mani ca ñañarijera, ʘmureco Pacu cū ca añurijere ca bii bau niiro to ca tii pacaro, ¿do biro pee mani ĩirãti? ¿ʘmureco Pacu ñañagu cū niiti, to biro ñañaro manire tiigu? Bojoca cūja ca tugoeñari wãmere biro yu ĩi.

⁶ ¡Biitimi! ʘmureco Pacu ñañagu cū ca nijata, ¿do biro tiicãri bojoca ñañaro cūja ca tiirije wapare ñañaro cūjare cū tiibogajati?

⁷ Jĩcū o biro ĩibocumi: Ȳ ca ĩi ditorijera, ʘmureco Pacu yee díamacū ca niirijere to ca bii bau niiro, cū ca añu majuropeerijere buaro jañuro to ca bii n̄n̄ua waaro ca tii pacaro, ¿ñee tiigu ʘmureco Pacu, ñañagure biro yure cū tiiti?

⁸ To biro to ca biijata: “¿Ñee tiirã ñañarije peere mani tiititi, añurije maquẽ pee to nii eajato ĩirã?” ĩicumi. O biirije peti jãa ca ĩitirijerena, “O biirije ĩi buema,” jãare ĩi wede paima jĩcãrã. To biro ca ĩirã ñañaro ca tii ecoparã niirucuma.

“Jĩcū peera añuḡu manimi”

* 3:4 Sal 51.4.

9 “¿Do biro mani ñi yapanorãti? ¿To docare mani judíos mani ca niirije j̄morira, aperã amet̄enero añurã mani niiti? ¡Mani biiti! Mee, mani judíos, judíos ca niitirã cãa, j̄icãri cõro ñañarije ca tiirã mani niicãupa,” mani ñi yerijãajãw̄n.

10 To birira owarique o biro ñi:

“J̄icũ uno peera añuḡn ca niiḡn manimi; j̄icũ uno mani majuropecãmi.

11 Ca tugoeña majiḡn uno manicãmi. Æm̄ureco Pac̄ure ca majirugaḡn uno cãa, j̄icũ uno peera manicãmi.

12 Niipetirãp̄ura cãre camotaticoama. Niipetirãp̄ura ñañarije pee wadore tiicã yai waama.

J̄icũ uno peera añurije ca tiiḡn uno manicãmi.

j̄icũ unoacã niirucu biiti majuropecãmi!”†

13 “M̄uja wedericagaaria, maja ope ca tujurore biro nii.

M̄uja ñemerori, ca ñi dito pairije nii.”‡

“¡M̄uja ñjerorip̄a cãare aña nimara niicã!”§

14 “Ñañaro m̄uja ca ñi tutirije wado m̄uja ñjerorire dadacã.”*

15 “J̄ia díi tii baterugarp̄na, m̄uja d̄upori tutua añuro ñmaa nucũ yujucã.

16 M̄uja ca tii niirije, tii yaio baterique, ñeeja manirã tuaricaro ca tiirije wado niicã.

17 Añuro j̄icãri mena nii n̄n̄na waariquere majitima.”†

18 “Æm̄ureco Pac̄ure nucũ b̄oriquere uno cãare tugoeñati majuropecãma,

† **3:12** Sal 14.1-3; 53.1-3; Ec 7.20. ‡ **3:13** Sal 5.9. § **3:13** Sal 140.3. * **3:14** Sal 10.7. † **3:17** Is 59.7-8.

cũ ca ĩa cojorore,” ĩi.‡

19 Niipetirije doti cũurique ca ĩirijea, teere ca tii nunuĵeerãre ĩi, niipetirã do biro ĩi wede majitiri, niipetirãpura Ũmureco Pacu ñaňaro cũ ca tiirijere, ñaňaro ca biiparã cũja niijato ĩiro, mani ĩi maji.

20 To biri ĩicũ uno peera doti cũurique ca ĩirore biro cũ ca tiirije juorira, Ũmureco Pacu cũ ca ĩa cojorore “Aňugũ niimi,” ĩi ecotirucumi. Doti cũuriquea, ñaňarije ca tiirã mani ca niirijere mani ca majiro ca tiirije pee nii.

Díamacũ tũo nucũ buorique juori, aňurã niirique

21 To biri mecũra doti cũurique manirora, Ũmureco Pacu, aňurã mani ca niiro cũ ca tiirije bii bau nii ea, doti cũurique, Ũmureco Pacu yee quetire wede juĵueri maja, cũja ca wederique.

22 Ate, Ũmureco Pacu aňurã mani ca niiro cũ ca tiirijea, Jesucristore díamacũ tũo nucũ buorique juori ea, niipetirã cũre ca tũo nunuĵeerãre. § ĩa dica woorique mani,

23 niipetirãpura ñaňarijere tiicãma. To biri Ũmureco Pacu aňurije cũ ca boo jãarore biro mani tii eaticã.*

24 Biirãpua, Ũmureco Pacu cũ ca aňurije juori, wapa manirora aňuro tii ecoma, ñaňaro mani ca bi-iboriquere Cristo Jesús cũ ca ametuene bojarique juori.

‡ 3:18 Sal 36.1. § 3:22 Jesucristore díamacũ tũo nucũ buorique juori, niipetirã cũre ca tũo nunuĵeerãre aňurã cũja ca niiro tiimi Ũmureco Pacu. *

3:23 Niipetirãpura ñaňarije ca tiirã wado niicãma. To biri Ũmureco Pacu cũ ca aňu majuropeerije mena cũ ca bojoca cuti niiri tabe o peepua niicãma.

25 ʘmureco Pacu, Cristo cū ca bii yairo ti-iri, ñañarije tiiriquere cū ca ametuene bojaro ti-iupi. Ate ñañarije tiiriquere ametuene ecoriquera, Cristo cū ca bii yai bojariquere díamacū tuo nucū buorique juori buarique nii. O biro tiiri, añurā mani ca niiro cū ca tiirijere ññorugaupi ʘmureco Pacu, ména jugueropura ñañarije mani ca tiirijere to birora cū ca ña ametuacāriquere manire ametuenu.

26 Cūa ca tugoña bayigu niimi. Ati cuupure añurā mani ca niiro cū ca tiiri wāmere ññorugaupi; cūa añugu cū ca niimore birora, Jesús're ca tuo nunujeerāre añurā cūja ca niiro tiimi.

27 To docare, “¿Bojocu, ‘o biro ca biigu yu nii,’ cū ca ñirije noopu to niiti? ¿Tea peticoa! ¿Ñee juori to biiti? ¿Doti cūurique ca ñiire biro tii nunujeerique juori to biiti? Tee juori méé bii. Díamacū tuo nucū buorique juori pee to biro bii.

28 Doti cūurique ca ñiire biro tiirique juori méé, díamacū tuo nucū buorique juori pee, bojocure añugu cū ca niiro tiimi ʘmureco Pacu,” mani ñi yapano ea.

29 To docare ¿ʘmureco Pacu, judíos ʘmureco Pacu wado cū niiti? ¿Bojoca poogaari niipetirā ʘmureco Pacu méé cū niiti? Ati yepa macārā niipetirā bojoca poogaari ʘmureco Pacu niimi.

30 Apí ʘmureco Pacu manimi. Cūra, díamacū tuo nucū buorique juori, jeyua quejero yapare wide taaricarāre, ca wide taaya manirā cāare, añurā cūja ca niiro tiirucumi.

31 To docare, ¿díamacū tuo nucū buorique juorira, doti cūurique ca wapa maniro mani tiicāti? Mani tiiti. Doti cūurique ca ñiire biro pee tiirā mani tii.

4

Abraham cã ca t̃no ñucã b̃horique

¹ To docare ¿mani ñicã Abraham cã ca biirique peera, do biro mani ñirãti?

² Yee mééra Abraham cã, cã ca tiirije j̃horira, añug̃ cã ca tii ecojata, “O biro ca biig̃ ỹ nii,” cã ca ñi ɱjero bayirijere díamacãra ñibojacupi, biig̃ap̃ua Ƴm̃ureco Pac̃ cã ca ña cojoro méére.

³ Ƴm̃ureco Pac̃ wederique o biro ñi: “Ƴm̃ureco Pac̃re t̃no ññj̃eeupi Abraham, tee j̃hori, ‘Añug̃ niimi,’ ñi ecoupi,” ñi.*

⁴ J̃icã cã ca padejata, cã ca wapa taarije wapa manirora cã ca tiicojo ecorije méé nii, cã ca paderique warap̃ cã ca wapa taarije nii.

⁵ To ca bii pacaro, j̃icã ɱno, Ƴm̃ureco Pac̃, ñañarãre, ca ñañarije manirã cãja ca niiro ca tiig̃re cã ca t̃no ññj̃eejata, díamacã cã ca t̃no ñucã b̃horije j̃horira, “Añug̃ niimi,” ñi ecomi, teere b̃nar̃ug̃ cã ca pade b̃ua ñaati pacaro.

⁶ David cãa to birora ñiupi, bojoc̃ cã ca tii niirije j̃hori méé, Ƴm̃ureco Pac̃ añug̃ cã ca niiro cã ca tiig̃ ca ɱjea niig̃ yee maquẽre, o biro ñig̃:

⁷ “Ƴm̃ureco Pac̃, cãja ca ñañarijere amet̃ene, ñañarije cãja ca tiirijere to birora ña amet̃a, cã ca biirã, ɱjea niima.

⁸ Ca ñañarije manigure biro wiog̃ cã ca ñag̃, ɱjea niimi,” ñiupi.†

⁹ ¿To docare ate ɱjea niiriquea, jeyua quejero yapare wide taaricarã wadore ñiro to ñiti? ¿Ca wide taaya manirã cãare ñiro méé to ñiti? To birira Ƴm̃ureco Pac̃, Abraham're “Añug̃ niimi,” ñirug̃,

* **4:3** Gn 15.6; Ro 4.22. † **4:8** Sal 32.1-2.

díamacũ cã ca tũo nũcã bũorijepũre ĩaupi, mani ĩjãwũ mee.

¹⁰ ¿No cõropũ, “Añugũ,” cãre cã ĩaupari? Cã jeyua quejero yapare cã ca wide taa ecoro jiro pee, ¿jugueropũra añugũ cãre cã ĩaupari? Jiro méé, jugueropũra añugũ cãre ĩaupi.

¹¹ Cã jeyua quejero yapare wide taaya manigũpũra, díamacũ cã ca tũo nũcã bũorije jũori, “Añugũ niimi,” ĩi ecoupi Æmũreco Pacũre. Añugũ cã ca niirijere to bii ĩñojato ĩigu, jiropũ cã jeyua quejero yapare wide taa ecoupi Abraham. To biri Abraham, cãja jeyua quejero yapare ca wide taaya manirã nii pacarã, ca tũo nũnũjeerã niipetirã pacũ niimi. O biro cãja ca biiro macã cãja cãare cãja ca tũo nũnũjeerije jũori, “Añurã niima,” ĩimi Æmũreco Pacũ.

¹² Nũcã, cãja jeyua quejero yapare ca wide taari-carã nii pacarã, mani ñicã Abraham cã jeyua quejero yapare ca wide taaya manigũ niigũpũra cã ca tũo nũnũjeericarore biro ca tũo nũnũjeerã cãare cãja pacũra niimi.

Díamacũ tũo nũcã bũorique jũori, Æmũreco Pacũ cã ca ĩiricarore biro ca bii earique

¹³ Doti cũurique jũori méé, Abraham're, cã pãramerãre, “Ati yepare mũ cũo earucu,” Æmũreco Pacũ cã ca ĩiriquere ñeeupa. Tũo nũnũjeerique jũori, añugũ cã ca niiro cã ca tiirique jũori pee, to biro ĩiupi Æmũreco Pacũ.

¹⁴ Doti cũuriquere ca tii nũnũjeerã pee teere ca cũo eaparã cãja ca niijata, tũo nũnũjeerique pea watoa maquẽ nii, Æmũreco Pacũ, “To biro yũ ti-irucu,” cã ca ĩirique cãa wapa mani, biicãbojacupa.

15 Doti cūuriquea, ñañaaro tii ecoricaró tii. Ñucã doti cūurique ca manicãjata, teere bii ametene nũcãrique cãa mani.

16 To biri Æmũreco Pacũ, “O biro yũ tiirucu,” cã ca ĩriquerere díamacũ tũo nũnũjeerique jũori bũa earique nii, Abraham pãramerã niipetirãpũre to biro wapa manirora bũa earique to niicõa niijato ĩiro. “Yũ tiicojorucu,” cã ca ĩriquerere, doti cūuriquerere ca tii nũnũjeerã yee wado mée nii, ñucã niipetirã Abraham're biro ca tũo nũnũjeerã cãare to birora biicã. Cãa to biro biima ĩigu, Æmũreco Pacũ cã ca ĩa cojorore mani niipetirã pacũ niimi.

17 Æmũreco Pacũ wederique o biro ca ĩirore birora: “Pacũ bojoca poogaari pacũ mũre yũ tii.” Cã niimi Æmũreco Pacũ, Abraham díamacũ cã ca tũo nũnũjeericũ, ca bii yaicoaricarãpũrena cãja ca catiro tii, ca manirijerena tii jeeño, ca tiigu.‡

18 Abraham, cã ca yue niirijeŒ ca peticoa pacaro, to birora tũo nũnũjee yuecã niĩupi. O biro biima ĩigu, pacũ bojoca poogaari pacũ nii eaupi, “Mũ pãramerã ano cõro pacũ niirucuma,” Æmũreco Pacũ cãre cã ca ĩiricarore birora.

19 Mee, Abraham cien cãmari peti ca cũogũ niiri cã upũrire ca bii yaicoariquerere biirijepũ ca niirijere ĩa maji, ñucã Sara cõ ca macã cutiborique mũo cãa peticoa, ca biicã pacaro, cãre cã ca ĩriquerere cã ca tũgoeña yue niirije pea daquecoa, cãre biiticãupa.

20 Æmũreco Pacũ “To biro yũ tiirucu,” cãre cã ca ĩriquerere, ca tũo nũnũjeetigu cã ca biirore biro

‡ 4:17 Gn 17.5. § 4:18 “Yũ macã cutirucu,” cã ca ĩi yue niimirique ca peticoa pacaro, Æmũreco Pacũ cãre cã ca ĩriquerere to birora tũo nũnũjeecõa niĩupi.

“Yeera yare ñicãjacupi,” ïitiupi. To biro ïitigura, cãre cã ca ñiriquere b̃aro jañuri díamacũ t̃o ñcũ b̃o, Ƴm̃areco Pac̃a baja peo ñcũ b̃o, tiupi,

21 “Ƴm̃areco Pac̃a ‘To biro ỹa tiirucu,’ cã ca ñiriquere cã ca ñiricarore birora ca tii tutuagu niicumĩ,” ñi majiri.

22 Tee j̃ori Ƴm̃areco Pac̃a, to biro cã ca biirijere ña, “Añug̃a niimi,” cãre ñupi.

23 Ate to biro cã ca biirijere Ƴm̃areco Pac̃a, “Añug̃a niimi,” cã ca ñiriquere, Abraham yee wado meere owarique niupa.

24 Mani yee maquẽp̃a cãare owarique niupa. Mani cãare, cã ca ñiriquere díamacũ mani ca t̃o ñcũ b̃orije j̃orira, añurãre biro manire ñarucumi Ƴm̃areco Pac̃a, mani Wiogu Jesús're ca bii yairicarã watoare cã ca cati tuaro ca tiiricare díamacũ mani ca t̃o ññjeerije j̃ori.

25 Cãra mani ca ñañarije wapare manire bii yai bojarug̃a, wedejãa buiyee cõa eco, j̃cãti ano peera ñañarije ca tiitiricarãre biro mani ca niipere ñigu cati tua, biupi.

5

Añuro nii, ñjea nii, biirique

1 Díamacũ t̃o ñcũ b̃oriquere j̃ori añurã tii ecori, Ƴm̃areco Pac̃a mena añuro mani nii, mani Wiogu Jesucristo j̃ori.

2 Ñucã Jesucristo j̃orira, cã ca ñiriquere díamacũ t̃o ñcũ b̃oriquere j̃ori, ate añurijere ca b̃a eparã mani ca niirijere mani c̃o, teep̃are to birora mani ca tugoeña bayicõa niirijere. To biri Ƴm̃areco Pac̃a

cã ca añu majuropeerije mani ca bua eaperure ñirã, buaro mani ujea nii.

³ Biirãrua ate wado méere, ñañoaro tamuorã cãa, “O biro ca biirã jãa nii,” mani ñi ujero bayirucu, ñañoaro mani ca tamuorijea ca tũgoeña bayirã mani ca niiro ca tiirijere ca majirã niiri.

⁴ Tũgoeña bayiriquera, ca bojoca añurã mani ca nii earo tii, ca bojoca añurã mani ca nii earo ca tiirijera, to birora ca yuecõa niirã manire tii.

⁵ Mani ca yue niirije pea boboro mani ca tamuroro tiiti, Umuereco Pacu, Añuri Yeri manire cã ca tiicojoricu mena, cã ca mairijere mani yeripure paio manire cã ca tiicojorije ca niiro macã.

⁶ Ména ñañarije wapare do biro mani ca bii ametua majitiri tabere, “To biro biirucu,” cã ca ñirica yutea ca earo, ñañarije ca tiirãre bii yai ametuene bojaupi Cristo.

⁷ Jĩcã uno peera arĩru cã ca bii yaiborica tabe unorena, “Yu, yu bii yai bojarucu” ñirique, popiye méera niicã biiti. Ca bojoca añugũ petipũ cãare bii bojaya manicu. Ape tabera niicãbocumi biigũrua, jĩcã buaropũra añuro cũre ca tiiricu unore ca bii yai bojagu uno.

⁸ Umuereco Pacu pea manire cã ca mairijere ate mena ññomi: Ména ñañarijere ca tiirã mani ca niirora, mani yee juori bii yaiupi Cristo.

⁹ Mecũra Cristo cã ca bii yai bojarique juori, añurã ca tii ecoricarã niiri, cã juorira, Umuereco Pacu ñañoaro cã ca tiirijere mani ametuarucu.

¹⁰ Ména Umuereco Pacu waparã mani ca niirora, cã Macũ cã ca bii yai bojarique mena, cã majuropeera cã mena añuro mani ca nii earo tiupi.

To biri mecã docare cã mena añuro ca niirã niiri, ametuenero cã ca catirije juori mani ametuarucu.

¹¹ Ate wado méé, mani Wiogũ Jesucristo juori, Æmureco Pacure buaro mani ujea nii, cã juori cã mena añuro nii eariquere ca tiicojo ecoricarã niiri.

Adán to biri Cristo

¹² Jĩcã bojocũ Adán juori, ñañarije tiirique bo-jocarũre bii ñaajãa nũcã eaupa; tee tiiro ñañarije tiirique juorira bii yairique cãa nii eaupa. O biro biima ñiro, niipetirãrũre bii yairique niicã nũnũa dooupa, niipetirãrũra ñañarije cãja ca tiicãro macã.

¹³ Doti cũurique ca niiparo juguerorũra, ati yerarũre ñañarije tiirique nii yerijãaupa. Doti cũurique ca manijata, ñañarije tiiriquere majiña mani.

¹⁴ To ca bii pacaro, Adán cã ca niiri cuu mena, Moisés cã ca niiri cuurũ, ñañarije ca tiiricarãre bii yairique to birora biicõa niuupa. Biiorũra cãjara, Adán, ca doopũre ca bii juagueũ, dotiriquere cã ca bii ametua nũcãricarore biro méé, ñañarije cãja ca tiirije juori, to biro biuupa.

¹⁵ Adán ñañarije cã ca tiiriquea, Æmureco Pacũ wapa manirora añuriye cã ca tiicojorijere biro méé nii. Jĩcũra ñañarije cã ca tiirique juorira, niipetirãrũra bii yaicãupa. Jĩcũ, Jesucristo juori wadora, wapa manirora Æmureco Pacũ añuriye cã ca tiicojorije pea, tee ametuenerorũ nii eacãupa, paũrũ añuro cãja ca niipere biro ñiro.

¹⁶ Jĩcũ ñañarije cã ca tii buiyeerique juori ca bii nũnũa waarijere, Æmureco Pacũ, wapa manirora añuriye cã ca tiicojorije menare cõõñarique uno méé nii. Ñañaro biiriquea, jĩcã wãme ñañarije tiirique

j̄orira ñañoaro bii yairicaró tiiupa. Ɛm̄areco Pac̄u, wapa manirora c̄u ca tiicojorije pea, pā wãmeri ñañarije tiirique j̄ori bii eari, añurã niiricaró ti-iupa.

17 J̄ic̄u ñañarije c̄u ca tiirique j̄orira niipetirãp̄ure bii yairique ca bii niiricarore biro amet̄enero, Ɛm̄areco Pac̄u ca bojoca añuḡu c̄u ca niirijep̄u, wapa manirora añurã c̄u ca tiirã doca, j̄ic̄u bojocu Jesucristo j̄ori wadora, catirãra wãma wãme cati niirucuma.

18 Adán wado ñañarije c̄u ca tiirique j̄orira, niipetirãp̄ure ñañoaro ca bii yaiparã c̄uja ca niiro ca tiiricarore birora, Jesucristo wadora añurije c̄u ca tiirique j̄orira, c̄ure ca t̄uo n̄un̄jeerãre añurã c̄uja ca niiro tii, to birora c̄uja ca caticõa niipere biro ñiro.

19 O biro ñi: J̄ic̄ura Ɛm̄areco Pac̄ure c̄u ca amet̄ene nucãrique j̄orira, pā ñañarije ca tiirã c̄uja ca niiro c̄ujare tiicãupa. Ñucã tee ca biiricarore birora, j̄ic̄ura Ɛm̄areco Pac̄ure c̄u ca t̄uo n̄un̄jeerique j̄orira, pā añurã tii ecorucuma.

20 Doti c̄urique pea, ñañarije tiirique buaro jañuro to bii bau nii n̄un̄u waajato ñiro tiicojorique niuupa. Ñañoaro tiirique buaro jañuro ca bii n̄un̄u waarora, Ɛm̄areco Pac̄u c̄u ca añurije pea tee amet̄enerop̄u nii nemocãupa.

21 Ñañarije tiirique bii yairicaró ca tii tutua niiricarore birora, Ɛm̄areco Pac̄u wapa manirora añuro c̄u ca tii bojorique añurã manì ca niiro tii, manì Wioḡu Jesucristo j̄ori to birora caticõa niiriquere manire tiicojo, tii doti tutua niuupa.

6

Ñañarijere bii yai weo, Cristo mena pee cati, bi-irique

¹ ¿To docare ñee mani ñirãti? ¿Ñañarijera mani tiicõa niirãti, Umureco Pacu buaro jañuro cû ña mai nunña waajato ñirã?*

² ¡Mani tiiti majuropecãrucu! Mee ñañarijere ca bii yai weoricarãpã mani nii. ¿Ñee tiirã, ñañarijera mani tiicõa niibogajati?

³ ¿Maja, Cristo Jesús mena niirugarã ca uwo coe ecoricarã niipetirã, cû ca bii yairicarore birora biirã, mani ca uwo coe ecoriquere maja majititi?

⁴ To biri uwo coerique jãori, Jesucristo menara yaa cõa eco, cû ca bii yairicarore biro mani biiwã. O biro biicãri, Cristo, cû Pacu cû ca tutuarije mena cati tua, cû ca biiricarore birora mani cãa, wãma wãme catirique mena mani bii niico.

⁵ Cû menara, cû ca bii yairicarore biro ca biiricarã mani ca niijata, ñucã cû menara mani cati tuarucu.

⁶ Jãguero mani ca bii niirucurique Cristo menara yucu tenipã paa pua tuu yaio ecoupa, mani upã ñañarije ca tiiruga niirije ca tii yaio ecoro, ñañarije tiiriquere ca tii nunñjeerã mani ca nii nunña waatipere biro ñirã, mani ñi maji.

⁷ Bii yaicoarãpã, ñañarije mani tiiticu.

⁸ “Cristo mena mani ca bii yaijata, cû menara mani catirucu,” mani ñi.

⁹ Cristoa, ca bii yairicarã watoare ca cati tuaricãpã niiri, cû ca bii yai nemotipere mani maji.

* **6:1** ¿Añurije buaro jañuri to bii bau niijato ñirã, ñañarijera mani tiicõa niirãti?

Cūra, bii yairiquea do biro cäre bii ametuene nũcã majiti yua.

¹⁰ Cũ ca bii yairije mena, jĩcãti bii yaigũra, ñañarije tiiriquere bii yai ametuene peoticã co-joupi mee. Cũ ca catirije peera Ƴmũreco Pacũ yeere tiirũgũ catimi.

¹¹ To biri wãmera mũja cãa, ñañarije tiiriquere ca bii yai weoricarãpũre biro nii tũgoeñaña. Bii pacarã Cristo Jesús jũori, Ƴmũreco Pacũ yee peere ca tiiparã ca catirã niiña.

¹² To biicãri, mũja upũ ca bii yaipa upũre ñañarije tiirique pee ca bii ametuene nũcãro tii, ñũcã ñañarije ca tiirũgarije cãare tii nũnũjee, tiiticãña.

¹³ Mũja upũ maquẽre† ñañarije peere ca tiirije ca niiro tiicãri, ñañarije tiirique maquẽ ca niiro tiiticãña. To biro tiitirãra, Ƴmũreco Pacũ yee peere ca tiirije ca niiro tiiya, ca bii yaicoaricarãpũra, ca cati tuaricarãre birora mũja upũri maquẽre añurije peere ca tiirije pee ca niiro tiiri.

¹⁴ O biro mũja ca tiiro, ñañarije tiirique mũjare bii ametuenetirucu, doti cũurique ca ñiire biro tii nũnũa waatirãra, Ƴmũreco Pacũ añuro cũ ca tiirije mena pee mũja ca niiro macã.

Añurijere pade coteri maja

¹⁵ ¿To docare ñee mani ñirãti? ¿Doti cũurique ca ñiire biro tii nũnũa waatirãra, Ƴmũreco Pacũ wapa manirora añuro cũ ca tii bojarique mena pee ca niirã niiri, ñañarije mani tiirãti? ¡Mani tiiti majuropeecãrucu!

¹⁶ ¿Jĩcũre, cũ ca dotirijere tii nũnũjeerũgarã cãre pade coteri maja mũja ca niijata, mũja ca pade

† 6:13 Los miembros de su cuerpo.

bojagure wapa manirora pade coteri maja ni-
iriquere mɔja majititi? Atea teere birora bii,
bii yairicarɔ ca tiirije ñañarijere ca tii nɔnɔjeerã,
añurije maquẽre ca tii nɔnɔjeerã cãa, teere ca pade
coterã niima.

17 Añu majuropeecã Ƴmureco Pacu, ñañarijere
ca tii nɔnɔjeerã ca niimiricarã, mee mɔja ca yeri
tɔgoeña niirije menarɔ, añurije queti mɔja ca bue
majio ecoriquere mɔja tɔo nɔnɔjeeupa.

18 Ñañarije tiiriquere ametuene ecori, mecũra
añurije peere pade coteri maja mɔja nii yua.

19 Bojoca bii niiriquerena yu wede, tɔgoeña bay-
itima ñirã, atere añuro tɔo puotibocuma mɔjare
ñima ñigu. Jɔguerɔpɔre, mɔja upari maquẽre, ðo
pee jañuro ñañarije tii yai waaricarɔ ca tiirije
peere ca tiirije ca niiro mɔja ca tiiricarore birora,
mecũ cãare mɔja upari maquẽre añurije, ca ñañarije
manirã niiricarɔ ca tiirije peere ca tii nɔnɔjeerije
ca niiro tiiya.

20 Ména, ñañarije peere tii nɔnɔjee niirã, añurije
peere mɔja tii nɔnɔjeetiupa.

21 ¿Mecũre mɔja ca bobo tɔgoeñarije ñañarijere
tii niirã, ñee mɔja buari? Mɔja buatiupa. Tea bii
yairicarɔ ca tiirije wado nii.

22 Mecũra ñañarijere ca tii nɔnɔjee yerijãaricarã
niiri, Ƴmureco Pacu peere ca pade coterã nii eari,
ca ñañarije manirã nii, caticõa niiriquere bua eari-
caro tii, ca tiirijere mɔja bua.

23 Ñañarije tiirique wapa, bii yairique nii.
Ƴmureco Pacu cũ ca tiicojorije pea, maní Wiogu
Cristo Jesús jɔori caticõa niirique nii.

7

Amo jiarique mena ñi cõõña wederique

¹ ¿Ym yaarã, to docare mɔja majititi (doti cūurique ca majirãre mɔjare ym ñi) doti cūurique bojocure cū ca cati niiro wado cūre ca doti niirijere?

² O biro ñijata: Nomio ca manɔ cɔtigo, ca dotirije jɔori cõ manɔ cū ca cati niirore ñigo, cū mena niimo. Cõ manɔ cū ca bii yaicoajata, ca manɔ cɔtigo cõ ca niirijere ca dotirijere ca doti ecotigo tuamo.

³ O biro ca biirije jɔori, cõ manɔ cū ca cati pacaro apĩ cõ ca manɔ cɔtijata, ca manɔ cɔtigo cõ ca niirijere ca dotirijere ametɔene nɔcãgo tiimo.* Cõ manɔ cū ca bii yaicoajata docare, tee ca dotirijere ca doti ecotigo tuamo. To biri apĩ cõ ca manɔ cɔtijata cãare, ca mɔna epe paigo méé niimo.†

⁴ Ym yaarã, mɔja cãa to birora Cristo mena nii earã, cū menara doti cūuriquere mɔja bii yai weocãupa, apĩ ca bii yairicarã watoare ca cati tularicɔ yaarã pee niirɔgarã. O biro biicãri, Ɛmɔreco Pacɔ cū ca ña biijejarije añurije mani tii niirucu.

⁵ Ména ñañarije ca tii niirã mani ca niiro, doti cūuriquea, mani upɔpɔre ñañarije tiirɔgarique ca niirijere ca tii bau niiro ca tii niirije niipua. To biri bii yairicaro ca tiirije wadore mani tiicã niirucu-
upa.

⁶ Mecãra, doti cūurique manire ca doti niirucumiriquere ca bii yai weoricarã niiri, jɔgueropɔ doti cūurique ca nii jɔoriquere ca tii nɔnɔjeerã méé

* **7:3** “Ca manɔ cɔtigo nii pacago ca mɔna epe paigo niimo” ñirico niirucumo. † **7:3** Manɔ cɔti, nɔmo cɔti, tiiriquere ca doti niirijere bii ametɔene nɔcãgo méé biimo.

mani nii, Añuri Yeri wãma wãme cã ca doti niirije mena pee Ëmureco Pacure tii nãnjeeerugarã.

Ñañarije yure ca niirije

⁷ ¿To docare ñee mani ñirãti? ¿“Doti cūurique ñañarije nii,” mani ñirãti? ¡Mani ñiti majuropeecãrucu! Doti cūurique ca manijata, ñañarije ca niirijere yu majitibojacupa. Ña ugoriquere yu majitibojacupa, doti cūurique, “Ña ugoticãña,” to ca ñitijata.‡

⁸ Ñañarije pea, doti cūurique to biro ca ñirije juori, niipetirije ña ugoriquere yure tii bau niuwu. Doti cūurique ca manijata, ñañaro tiirique manirore biro biicã.

⁹ Doti cūuriquere ca majitigu yu ca niiri cuupure cati añugu yu niuwu. Doti cūuriquere yu ca majiro, ñañarije yu ca tiirique bii bau nii eacãwu. To biri ca bii yairura yu niicãwu. §

¹⁰ To biri doti cūurique, catirique yure ca tiicojoriquera, ca bii yairu yu ca niiro yure tiicãwu.

¹¹ Ñañarije pea, doti cūuriquerena nii eari, ñañaro yu ca tii bui catiro yure tiuwu. Tee juori ca bii yairura yu niicãwu.

¹² O biro mani ñi yapano, añuro petira doti cūuriquea, ca ñañarije manirije nii, ca doti niirije cãa ca ñañarije manirije, díamacã ca niirije, añurije, nii.

¹³ To docare, ate añurijera, ¿ca bii yairu yu ca niiro yure to tiicãjapari? ¡Tiitijacupa! Ñañarije, ñañarijera ca niirijere ñorugaro, añurije juorira, ca bii yairu yu ca niiro yure tiuwu. O biro biiri, doti

‡ 7:7 Ex 20.17; Dt 5.21. § 7:9 To biri ñañaro bii yairica taberu ca waaruga yu niicãwu.

cūurique j̄ori, ñañarije, díamacūra ñañarije peti ca niirijere bii bau nii eacãw̄.

14 Doti cūuriquea Ɛmureco Pacu yee nii. Yu pea, bojocu ca t̄goeña tutuatigu, ñañarijere ca tii n̄n̄jeerp̄ noniricu yu niicã.

15 Yu ca tiirijere yu t̄mo majiti. Yu ca tiirugarijere tiitigura, yu ca junarije peere yu tiicã.

16 To biri yu ca junarije peere ca tiigu niiri, “Doti cūurique, añurijera nii,” yu ñi.

17 To biri yua yu méé yu nii, teere ca tiigu. Yurure ñañarije ca niirije pee to biro tii.

18 Yurure ca t̄goeña bayitigu yu ca niiri urure añurije ñora ca manicãrijere yu maji; añurije ca tiicãrugagu nii pacagu, yu tii jeeño majiticã.

19 To biri yu ca tiirijea, añurije yu ca tiirugarije méere yu tii, ñañarije yu ca junarije peere yu tii.

20 To biri yua, yu ca junarijerena yu ca tiijata, yu méé yu tii. Yurure ñañarije ca niirije to biro tii.

21 O biro ca biirije j̄ori atere yu maji: Añurijere yu ca tiicãraga pacaro, ñañarije mena wado biicã.

22 Yu ca t̄goeñarijepua, Ɛmureco Pacu cū ca dotirijere buaro boo t̄goeña.

23 To ca bii pacaro, yu ururure apeye ca doti niirijere yu ña, ñañarijere ca doti niirije ca niirijere. Ate ca dotirije, yu ca t̄goeñarije ca dotirije menare ameri quēe niima ñiro, ñañarijerena yu ca tii n̄n̄jeecōa niiro yure tii.

24 ¡Abé nija yu niiquĩgu! ¿Ati uru mena ñañarije tiicãri yu ca bii yaipere ñiru peti yure cū amet̄eneguti?

25 Ɛmureco Pacu, mani Wiogu Jesucristo j̄ori, “Añu majuropecã,” yu ca ñigu wado amet̄ene

majimi. O biirije ca biiro macã, yu ca tugoeña niirije mena peera, yu majuropeera Umureco Pacu cã ca dotirijere yu tii nunajee, yu upu ñañarije ca tii niiri upu mena peera, ñañarije ca tii dotirije peere yu tii nunajeeã.

8

Añuri Yeri juori catirique

¹ To biri mecãra yua, Cristo Jesús mena ca niirãra ñañaro cãja ca bii yaipe uno mani.

² Jesucristo juori, Añuri Yeri catirique ca tiicojogu cã ca dotirije, ñañarijere, bii yairiquere, ca doti tutua niirijere yare ametuenuwu.

³ Umureco Pacu pea, Moisés cã ca doti cãurique do biro ca tii majitirijere tiipui. Do biro ca tiipe méé niipua, bojoca tugoeña bayitima ñirã ñañarije cãja ca tii niirije niima ñiro. Umureco Pacu cã Macãre, bojocu ñañarijere ca tii niigu ca tugoeña bayitigure biro ca niigu cãre tiicojoui, ñañarije tii niiriquere cã ametuene bojajato ñigu. Bojocu ca tugoeña bayitigure biro cãre tiiri, ñañarijere tii yaioupi Umureco Pacu.

⁴ Atere to biro tiipui, doti cãurique añurije ca dotirore biro cãja tii niijato ñigu. Mee ñañarije tiiruga tugoeñariquere ca tii nunajeerã méé mani nii, Añuri Yeri cã ca ñirore biro pee ca tii niirã mani nii yua.

⁵ Ñañarije ca tiirã, tee pee wadore tiiruga nunajeeã niima. Añuri Yeri cã ca ñirore biro ca tiirã pea, Añuri Yeri cã ca boorije pee wadore tiiruga tugoeñama.

⁶ Ñañarije tiiruga tugoeñariquere nucātima ñirã, tee pee wadore tiiruga nũñjeecã niiriquea, bii yairicaró ca tiirije nii. Añuri Yeri yee peere tiijata, añuro nii, cati, biiricaró tii.

⁷ Ñañarije cãja ca tiiruga tugoeñarijere nucātima ñirã, tee pee wadore ca tiiruga nũñjeecõa niirã, Æmureco Pacure ca junarã niima. Cã ca dotirijere booti, tii nũñjee majiti, biicãma.

⁸ To biri ñañarije cãja ca tiiruga tugoeñarijere ca nucātirã, Æmureco Pacu cã ca ña ujea niirijere tii majitima.

⁹ Maja pea, ñañarije ca tiirã méé maja nii yua. Añuri Yeri cã ca boorore biro pee ca tiirã maja nii, díamacãra Æmureco Pacu yũũ Añuri Yeri mujapure cã ca niijata. Cristo yũũ Añuri Yerire ca cuotigua, Jesucristo yũũ méé niimi.

¹⁰ Cristo mujapure cã ca niijata, maja upu pea ñañarije jũori ca bii yaipa upu to ca nii pacaro, Æmureco Pacu yũũ Añuri Yeri pea maja ca catirije niimi, añurã cã ca tiirije jũori.*

¹¹ Cristo cã ca cati tuaro ca tiiricu yũũ Añuri Yeri mujapure cã ca niijata, Cristo cã ca cati tuaro ca tiiricu Æmureco Pacura maja upuri ca bii yairijere wãma catirique tiicojorucumi, cã yũũ Añuri Yeri mujapure cã ca niirije jũori.

¹² To biri yu yaarã, jĩcã wãme mani ca tii niipe nii. Biirõpua mani upu ñañarije ca tiirugarije peere mani ca tii niipe méé nii.

¹³ Tee ñañarijere maja ca tii niijata, ñañaro tamuo yairica taberu maja waarucu. Añuri Yeri jũori,

* **8:10** Maja yeri pea caticã, Æmureco Pacu, jĩcãti ñno peera ñañarije ca tiitiricarãre biro mujare cã ca tiirique jũori.

ñañarije tiiriquere mɔja ca tii yaiojata, mɔja cat-icõa niirucu.

¹⁴ Niipetirã, Ɔmɔreco Pacɔ yɔɔ Añuri Yeri cã ca majiorore biro ca tii niirã, Ɔmɔreco Pacɔ puna niima.

¹⁵ Mɔja, ñucã ca uwi duwi yujurã mɔja ca niiro ca tiipa yeri méere mɔja ñeeupa. Añuri Yeri, Ɔmɔreco Pacɔ puna niiricaro ca tiigure mɔja ñeeupa. Cũ jɔorira, Ɔmɔreco Pacɔre, “¡Abbá! ¡Cáacu!”† mani ñi.

¹⁶ Cũ, Añuri Yerira mani ca yeri cɔtirijerɔre, Ɔmɔreco Pacɔ puna mani ca niirijere wede majiomi.

¹⁷ Cũ puna mani ca niijata, cũ yeere ca cɔo nɔnɔjeerã niirã mani bii; Ɔmɔreco Pacɔ yeere ca cɔo nɔnɔjeerã, Cristo mena jĩcãri cũ yeere ca cɔo nɔnɔjeerã, niirã mani bii, cũ mena jĩcãri ñañaro mani ca tamɔojata, ñucã cũ mena jĩcãrira añuro mani ca tii nɔcũ bɔo ecorpere biro ñirã.

Jiropɔ añurije ca niipe

¹⁸ Ati ɔmɔrere ñañaro tamɔoriquea, añurije manire ca bii eape menare mani ca ña cõoñajata, mani majuropeecã.

¹⁹ Ɔmɔreco Pacɔ cũ ca jeeñorique, díamacũra Ɔmɔreco Pacɔ puna mani ca niirijere ca bii ñño eapa tabere pato wãcãrique mena yue nii,

²⁰ ñañaro ca biipe ca niiro ca tii ecorique niiri. Bi-iropɔa tee majuropeera to biro biitiupa. Ɔmɔreco Pacɔ, “To biro biirucu,” cũ ca ñirique niima ñiro to biro biupa. Bii pacaro nii,

† **8:15** Arameo wederique menara “Abbá” ñi, “Cáacu,” ñiro.

21 cū ca jeeñorique majuropeera ñañoaro ca tii eco niirijere ametuene ecori, Ҫm̄reco Pac̄a puna añurijer̄m̄ c̄ja ca ametuene ecori tabere c̄ja mena ca nii earo ca tiipe.

22 Cū ca jeeñorique niipetirijer̄m̄ra, j̄cō nomio mac̄a catigo puniro cō ca t̄goeñaore biro ca biirijere mani maji.

23 Tee wado méé ñañoaro tam̄o, mani, jiro mani ca b̄ap̄er̄m̄re īiḡm̄, Añuri Yerire cū ca tiicojo j̄m̄oricar̄m̄ c̄a to birora ñañoaro mani tam̄o, Ҫm̄reco Pac̄a punare biro tii ecori, ñañoaro mani ca tam̄ori up̄re cū ca ametuenera tabere yue niir̄a m̄no.

24 Tee, mani ca yue niirijerena īir̄a, mani ametuene ecow̄m̄. Yuerique ca bii earijer̄m̄a, yue nemorique méé nii. ¿Ñiru cū ca c̄otirijer̄m̄ena cū yuec̄o niigajati?

25 Mani ca c̄otirijere mani ca yue niijata, t̄goeña bayirique mena to birora mani yuec̄o nii.

26 O biri w̄amera, mani ca t̄goeña bayitirijere manire tii nemomi Añuri Yeri. J̄ai juu buerica w̄ame m̄nora mani īi majitic̄a, to biro mani ca biiro Añuri Yeri majuropeera do biro ca īi wede majiña manirije mena, otirique mena, Ҫm̄reco Pac̄are manire j̄ai bojami.

27 Ҫm̄reco Pac̄a, yerip̄a t̄goeñariquere ca majiḡm̄ niiri, Añuri Yeri cū ca īir̄ugarijere majic̄ami, Añuri Yeria, Ҫm̄reco Pac̄a cū ca boorore biro c̄a yaar̄are cū ca j̄ai bojarije ca niiro mac̄a.

Ca amet̄na n̄c̄a majuropeer̄a

28 ʘmureco Pacu, cãre ca mairãre añurije boojãgu, niipetiri wãmeri cãjare ca biiro tiimi, cã ca ïiricarore biro to biijato ïigu cã ca j̄horicarãre, mani ïi maji.

29 ʘmureco Pacu, j̄gueropura cã ca beje jeericarãre cã Macãre biro ca niiparã cãjare tiipupi, cã Macã pea pau ca tuo nunajeerã watoare cãja j̄wu cã niijato ïigu.

30 To biro biirucuma, cã ca ïiricarãrena j̄o, cã ca j̄horicarãrena, añurã cãja ca niiro tii, añurã cã ca tiiricarãrena, cã ca añu majuropeerijere ca cuo eaparã cãja ca niiro tii, tiimi.

31 ¿Atere ñee mani ïirãti? ʘmureco Pacu mani mena cã ca niijata, ¿ñiru uno pee ñañaro manire cã tiibogajati?

32 Cã Macã majurope cãare maitigura, mani niipetirã mani ca ñañarije j̄ori cã ca bii yairo ca tiiricu, ¿do biro ïigu, cã Macã mena j̄cãrira niipetirije manire cã tiicojotibogajati?

33 ¿Ñiru, ʘmureco Pacu cã ca beje jeericarãre “Ñañarije ca tiirã niima,” cã ïibogajati? ʘmureco Pacu niimi, ca ñañarije manirã ca tiigu.

34 ¿Ñiru ñañaro cãjare cã tiibogajati? Cristo Jesús manire bii yai bojaupi. Ñucã cati tua biicãri, ʘmureco Pacu díamacũ nuña‡ pee niiri, manire jãi boja niimi.

35 ¿Jesucristo manire cã ca mairijere, ñiru manire cã tuu dica wooguti? Ñañaro tamorique, do biro ca bii majiña manirije, ñañaro cãja ca tiiruga nunajeerije, aua boarique, juti boo pacarique, ca

‡ 8:34 Díamacũ nuña, Jesucristo do biro ca tiiya manigu cã ca duwiri nuña. Salmo 110.1; Mt 22.44.

uwiorije, ñañoaro jãa eco yairique cãa, manire tuu dica woo majiti.

³⁶ O biro ñi owarique:

“Mɯ yee jɯori, to cãnacã ɾɯmɯra ca bii yaiparã jãa niicã.

Oveja cãja ca jãaparãre biro jãare ñama,”

ca ñirore birora. §

³⁷ To ca bii pacaro, manire ca mairicɯ jɯori, ate niipetirijere ca ametɯa nɯcãrã peti mani nii.

³⁸ “Díamacãra, bii yairique ɯnora, catirique ɯnora, Ɛmɯreco Pacɯ ɾɯto macãrã ɯnora, wãtãa ɯnora, mecãre ca biirije ɯnora, jiro ca biipe ɯnora, ca yeri tutuarã ɯnora,

³⁹ emɯaropɯ ɯnora, ñañoaro bii yairica tabe ɯnora, jãcã wãme Ɛmɯreco Pacɯ cã ca jeeñorique ɯnora, mani Wiogɯ Cristo Jesús jɯori, Ɛmɯreco Pacɯ manire cã ca mairijere manire tuu dica woo majiti,” yɯ ñi.

9

Israelitas're Ɛmɯreco Pacɯ cã ca ami dica woorique

¹ Jesucristore ca tɯo nɯnɯjeegure birora ñi ditoricaro maniro, díamacã yɯ ñi. Yɯ ca tɯgoeñarije, Añuri Yeri cã ca majiorije jɯori, “To birora bii,” yɯre ñi.

² Yɯ yeripɯ buaro tɯgoeñarique pai, to birora puniro tɯgoeña cãa nii, yɯ bii.

³ Yɯ majuropeera, “Ñañoaro biirucumi,” ñiricɯ nii, Jesucristore ca majitigɯ nii, yɯ biicãrɯgami, yɯ yaarã, yɯ yaa pooga macãrã

⁴ israelitas're ñima ñigɯ. Cãja, Ɛmɯreco Pacɯ cã ca ami dica wooricarã niipura. Ɛmɯreco Pacɯ,

§ 8:36 Sal 44.22.

cā puna peti cāja ca niiro cājare tiupi. Cāja menara nii, cā ca doti tutuarijere cājare iño, tiupi. “Māja menare o biro yu tii niirucu,” cājare i, cā ca dotirijere cājare cūu, díamacū tii nucū buorica wāmere cājare wede majio, ñucā “O biro mājare yu tiirucu,” cājare iipi.

⁵ Jāa ñicū jūmāara niipura, Ūmureco Pacu yaarā. Cāja yaa puna macūra bojoca mani ca bii nūna doorica wāmere biro ijata, baupa Cristo, niipetirije jotoa Ūmureco Pacu ca niigu. To birora i nucū buocā niiricu cā nijato. To biro to bijato.

⁶ Ūmureco Pacu, Israel yaa pooga macārāre, “To biro yu tiirucu,” cā ca iirique, to birora biicā yerijāa waaro méé bii. Niipetirāpā Israel pāramerā ca niirā israelitas méé niima.

⁷ Ñucā Abraham pāramerā cāja ca niirije juorira, niipetirāpāra cā puna niitima. Ūmureco Pacu o biro cūre iipi: “Isaac juori, mā pāramerā cūtirucu,” iipi.*

⁸ O biro ijata: “Ūmureco Pacu puna ca niirā, tii puna macārā cāja ca niirije juorira cā puna niitima. ‘O biro yu tiirucu,’ cā ca iiricu puna pee doca, Abraham pāramerā niima,” iiricarā niima.

⁹ Ate nii Ūmureco Pacu, “O biro yu tiirucu,” cā ca iirique: “Ape cāmare ati cuu unora yu doorucu, to cōrore Sara jīcū macū cūtirucumo,” cā ca iirique.†

¹⁰ Tee wado méé nii ñucā, Rebeca puna cāa jīcūra pacu cūtiupa, mani ñicū Isaac wadore.

¹¹ Cāja ca bauparo juguero, añuriye, ñañariye, cāja ca tiitiropāra, Ūmureco Pacu, cā ca boorore

* **9:7** Gn 21.12. † **9:9** Gn 18.10, 14.

biro cã majuropeera cã ca beje amirijere díamacũra to nii eajato ñigu,

12 bojoca tii niirique jœori méé, Æmareco Pacũ cã ca jœogu niiriquere ñigu, o biro cœre ñiupi Rebecare: “Cã jũwũ pee cã baire pade coterucumi,” ñiupi,

13 o biro ñi owarique ca ñi rore birora: “Jacob're yũ maiwũ. Esaú peera yũ juna jañuwũ.”‡

14 ¿Ñee mani ñirãti? ¿To docare Æmareco Pacũ ñañagu cã niiti? ¿Niitimi!

15 Æmareco Pacũ o biro cãre ñiupi Moisés're: “Yũ ca ña mairugagure yũ ña mairucu. Yũ ca boo paca ñarugagure yũ boo paca ñarucu,” ñiupi. §

16 To biri cã ca jœorijea, bojocu cã ca boorije jœori méé; ñucã cã ca tii bayi niirije jœori méé, bii, Æmareco Pacũ cã ca boo paca ñarije jœori pee bii.

17 Æmareco Pacũ wederiquepũ, Egipto macũ wiogure o biro ñi: “Aterena ñigu, mũ mena yũ ca tutuarijere ñõorugũ, wiogu mũre yũ tiiwũ, niipetiri yerapũ yũ wãmere wede batorique ca niipere biro ñigu,” ñi.*

18 Tee tiigu Æmareco Pacũa, cã ca ña maigure ña mai, ca ametuene nucãgura bũaro jañuro to birora cã ca biicã nũnũa waaro tiicãmi.

19 Mũ pea yũre mũ ñicu: “To docare, ¿ñee tiigu Æmareco Pacũ, ‘To biro tiima,’ manire cã ñiti? ¿Ñiru pee cã ca boorijere cã ñi camotabogajati?” mũ ñicu.

20 Yũ pea o biro mũre yũ ñi: Mũa, ¿“Ñiru mũ niiti, Æmareco Pacũ cã ca tiirijere to biro mũ tii,” cãre ñirugũ? Mũja ca tũgoeñajata, ¿diiru, tiiru ca

‡ 9:13 Gn 25.23; Mal 1.2-3. § 9:15 Ex 33.19. * 9:17 Ex 9.16.

weericure ñee tiigu to biri jotu yare mu tiiri, to ñigajati?†

21 Jotari weeri majua, dii jicã burua maquërena ca nii majuropeerijere tiirã cøorique, niipetirijere tiirã cãja ca cøori jotari, wee majimi.

22 Æmureco Pacu, ñañoaro cã ca tiirijere, cã ca tu-tuarijere, ññoøaga pacagu, ñañoaro tii eco, ñañoaro bii yairica taberu waa, ca biiparãre tugoëña bayirique mena to birora cãjare ñacãupi.

23 Ñucã to biro biigua, manire ametuenerugu, buaro manire cã ca mairijere, cã ca añu majuropeerijere, ññoøupi. Jicãtoruaga manire boo paca ñari, cã mena mani ca niipere biro ñigu manire beje jeeupi.

24 Mania cãjara mani nii, judíos watoare, judíos ca niitirã watoa cãare, Æmureco Pacu cã ca jøoricarã.

25 Oseas cã ca owarica pũuropu Æmureco Pacu: “Yu yaa pooga ca niitiricarãre, ‘Yu yaa pooga,’ yu ñirucu.

Yu ca maitimiricarãrena, ‘Yu ca mairã,’ yu ñirucu.”‡

26 “ ‘Yu yaa pooga méé mija nii,’ cãjare cã ca ñirica tabera,

‘Æmureco Pacu ca caticõa niigu puna mija nii, ñiricarã niirucuma,’ ” cã ca ñiricarore birora. §

27 Israelitas cãja ca biipe peera o biro ñimi Isaías: “Israel yaa pooga macãrã jita duparire biro pañu nii pacarã, pañacã mééra ametuarucuma;

28 Wiogua, cã ca ñiricarore birora, yoari mééra ati yepa macãrãre ñañoaro tiirucumi,” ñimi.*

† 9:20 Is 29.16; 45.9. ‡ 9:25 Os 2.23. § 9:26 Os 1.10. * 9:28 Is 10.22-23.

29 Isaías'ra o biro ñiupi ñucã:
 “Ûmureco Pacu niipetirijepurena ca doti tutua
 niigu, mani Israel yaa pooga macãrãre cã ca
 duaticãjata,
 Sodoma, Gomorra macãrãre biro mani bii yaicã
 yerijãa waabojacupa,” ñiupi.†

Israelitas cãja ca tuo nunujeetirique

30 Atere ¿Ñee mani ñirãti? Judíos ca niitirã, añurã
 cãre tii ecorugarã añurije ca tiitirucuricarãrena,
 díamacũ cãja ca tuo nucũ buorije jwori, añurã cãjare
 tiupi Ûmureco Pacu.

31 Israelitas, doti cãurique jwori añurã nii eari-
 quere ca amamiricarã pea, añurã nii eariquere
 bua eatiupa.

32 ¿Ñee tiirã cãja bua eatijapari? Díamacũ tuo
 nucũ buorique mena méé teere amaupa, cãja ca tii
 nunujeerije jwori pee, teere amaupa, “Tee menara
 mani bua eacãrucu” ca ñi tugoeñarãre biro. To biro
 biima ñirã, ãtãgare puã taarãre biro biiupa.‡

33 O biro ñi owarique ca ñi rore birora:
 “Ñaña, Sión're jicãga ãtãga yu cãu, jicãga ãtãga bojoca
 cãja ca puata ñaaro ca tiipagare.
 Cãre ca tuo nunujeegua boboro tamotirucumi.”§

10

1 Yu yaarã, yu yeri ca boorije, israelitas're
 Ûmureco Pacure yu ca jãi bojarije, “Cãja
 ametajato” ñigu yu ca ñirije nii.

2 “Ûmureco Pacure buaropura ca tii nucũ
 buorugarã niima biirãrua” yu ñi, cãja yee maquere.

† 9:29 Is 1.9. ‡ 9:32 To biri Jesucristore tuo nunujeetima ñirã,
 ãtãga puã taarãre biro biiupa. § 9:33 Is 8.14; 28.16.

Tee peere to biro ca biicãrã nii pacarã, Æmureco Pacu yee díamacũ ca niirijere biro tiitima.

³ Æmureco Pacu añurã cã ca tiirijere majitima ïirã, cãja majuro cãja ca tiirije jœorira añurã niirugama ïirã, Æmureco Pacu añurã cã ca tiirijere junaupa.

⁴ Doti cœurique, Jesucristorena bii yapano ea, díamacũ cœre ca tœo nucũ bœorã niipetirã añurã cãja ca nii eapere biro ïiro.

⁵ Doti cœurique jœori añurã niiriquere o biro ïi owaupi Moisés: “Doti cœurique ca ïirore biro ca tii niigua, tee jœorira caticœa niiriquere bœarucumi,” ïiupi.*

⁶ Díamacũ tœo nucũ bœorique jœori añurã nii earique peera o biro ïi: “Mœja yeripu o biro ïi tœgoeñaticãña, ¿ñiru emureco tutipu cã mœa waa majigajati, ñucã Jesucristo cã ca duwi dooro tiirugu?†

⁷ ¿Ñiru ca œcœari operu cã duwi nucã waaguti, Jesucristore ca bii yairicarã watoaru cã ca tua mœa dooro tiirugu?” ïi.‡

⁸ To docare, “¿Ñeere to ïiti? Æmureco Pacu wederique mœ putora nii, mœ yeripu nii, mœ œjerorena nii, bii,” ïi doca. § Ate nii díamacũ tœo nucũ bœorique maquere jãa ca wederije.

⁹ Mœ œjero mena, “Wiogu niimi Jesucristo” ïi, mœ ca tœgoeña niirijeru, “Ca bii yairicarã watoare cã ca cati tuaro tiupi Æmureco Pacu,” mœ ca ïi tœo nunœjeejata, mœ ametœarucu.

¹⁰ Añurã niiriquere bœa earugarã, yeripu mena

* **10:5** Lv 18.5. † **10:6** Dt 30.12. ‡ **10:7** Dt 30.13. § **10:8** Dt 30.14.

díamacũ tʉo nʉnʉjee, ametʉariquere bua earugarã, ʉjero mena, “Wioḡu niimi Jesucristo,” ʉi, ʉirique nii.

11 ʉmʉreco Pacu wederique o biro ʉi: “Niipetirã cãre ca tʉo nʉnʉjeerã, boboro tamʉotirucuma” ʉi.*

12 To biri judíos, judíos ca niitirã menare, ameri ʉa dica woorique mani. Cã, Wioḡura, niipetirã Wioḡu niimi, tii nemorique cãre ca jãirã niipetirãre, niipetiro añurije cãja ca bua earo tiimi.

13 To biri: “‘Wioḡu jãare ametʉeneña,’ cãre ca ʉi jãirã niipetirã ametʉarucuma,” ʉi.†

14 ¿Do biro pee biicãri, cãja ca tʉo nʉnʉjeetiricurena, “Jãare tii nemoña,” cãja ʉibogajati? ¿Cũ yeere tʉo ñaati pacarã, do biro pee tiicãri cãre cãja tʉo nʉnʉjeebogajati? ¿Cũ yee maquẽre cãjare wederi maja cãja ca mani pacaro, do biro pee tiicãri cãja tʉobogajati? ¿Cũ ca wede doti cojoricarã niiti pacarã,

15 do biro tiicãri añurije quetire cãja wedebogajati? O biro ʉi owarique nii: “Añurije peti nii, queti wederi majʉ añurije queti ca jee doḡure jãi bocarique,” ʉi.‡

16 To ca bii pacaro, israelitas niipetirãpura añurije quetire tʉo nʉnʉjee, tiitiupa, Isaías o biro cã ca ʉi owaquĩricarore birora: “Wioḡu, jãa ca wederijere, ¿ñiru pee cã tʉo nʉnʉjeejapari?”§

17 To biri díamacũ tʉo nacũ buoriquea, añurije quetire tʉorique jʉori nii ea. Queti tʉorique pea, Jesucristo yee maquẽre wederique nii.

* **10:11** Is 28.16. † **10:13** “Wioḡure tii nemorique ca jãirã niipetirã ametʉarucuma.” Jl 2.32. ‡ **10:15** Is 52.7. § **10:16** Is 53.1.

18 Y_u pea o biro y_u ñi jáiña: ¿Añurije quetire cãja t_uotibujapari? ¡T_uojacupa! Ëm_ureco Pac_u wederique o biro ñi:

“Añurije quetire, niipetiri taberip_u wedeupa. Cãja ca wederije ati yepa ca nii eyori taberip_u ea peticoa,” ñi.*

19 Y_u jáiña nemo ñucã: ¿To docare israelitas, teere cãja t_uo puotibujapari?† Ca nii j_uori tabere o biro ñimi Moisés:

“Y_u yaa pooga macãrã ca niitirãre m_uja ca ña tutiro y_u tiirucu;
ca t_uo jeeñotiri pooga macãrã mena m_uja ca ajiaro y_u tiirucu,”‡ ñimi.

20 Ñucã Isaías pea o biirije ñimi:

“Y_ure ca amaaticarã y_ure cãja ca b_uaro y_u tiiw_u.
Y_ure ca jáiña amaaticarãre y_ure cãja ca majiro y_u tiiw_u,” ñimi.§

21 Israelitas yee peera o biro ñimi:

“T_uo n_un_ujeeti, amet_uene n_ucã, ca biiri poogare am_ureco yoari r_um_u y_u amorire y_u juu cojo niimiw_u,” ñimi.*

11

Israelitas ca nii d_ujarã

1 To biri y_u jáiña: ¿Ëm_ureco Pac_u, cã yaa poogare junag_u cã tiibujapari? ¡Junaticupui! Y_u cã, israelitara, Abraham pãrami, Benjamín yaa puna macã, y_u nii.

* **10:18** Sal 19.4. † **10:19** ¿Teere cãja ña majitibujapari? ‡ **10:19** Dt 32.21. § **10:20** Is 65.1. * **10:21** Is 65.2.

² Mee jĭcĭtopura Ũmureco Pacu, “Yu yaa pooga macĕrĕ niirucuma,” cĕ ca ĭricarĕ junatiupi. Ćmĭja, Elĭas, Ũmureco Pacure cĕ ca jĕi juu buerije mena, israelitas're cĕ ca wedejĕarique, o biro ĭi owarique ca ĭirijere mĭja majititi? O biro ĭiupi:

³ “Uru, mu yaarĕ mu yee queti wede jĕgueri majare jĭa bate, mre tii nĕcĕ buorĕ waibĕcarĕ joe mĕnerica tuturi cĕare paa abo bate, tiima. Yu jĭcĕra yu cati dĭja. Nĕcĕ yu cĕare jĭarugama,” ĭiupi Elĭas.*

⁴ To biro cĕ ca ĭiro, Ũmureco Pacu pea o biro cĕre ĭi yuupi: “Yu yaarĕ ca niiparĕ siete mil peti Baal're jĭcĕti uno peera ca ĭi nĕcĕ buotiricarĕ yu jee dica woowu,” ĭiupi.†

⁵ To biri wĕmera mecĕri cĕare, Ũmureco Pacu, cĕ ca mairije mena cĕ ca beje jeericarĕ israelitas jĭcĕrĕ dĭjama.

⁶ Cĕ ca ĭa mairije jĕori cĕ ca beje amijata, aĕurije tii niirique jĕori mĕe bi. Too to ca biijata, Ũmureco Pacu cĕ ca mairije, cĕ ca mairije mĕe niicĕbojacupa.

⁷ To docare Ćdo biro mani ĭirĕti? Israelitas, cĕja ca amariquere bua eatiupa. Ũmureco Pacu cĕ ca beje jeericarĕ pea bua eaupa. Ca tuogĕatirĕ pea to birora cĕja biicĕjato ĭi ecocĕupa.

⁸ O biro ĭi owarique ca ĭirote birora:
 “Cĕja ca cati tĕgoeĕa niirijepu ca tuo jeeĕo majitirĕ cĕjare tii, ca ĭa jeeĕotirije cĕja capere tii, nĕcĕ cĕja amoperi cĕa ca tuo jeeĕotirije ca niiro tii, cĕjare tiupi Ũmureco Pacu. To biri ati rumaripu cĕare to birora biicĕma,” ĭi.‡

⁹ David cĕa o biro ĭiupi:

* 11:3 1R 19.10, 14. † 11:4 1R 19.18. ‡ 11:8 Dt 29.4; Is 29.10.

“Cūja boje r̄m̄urira yoo yuericarore biro cūjare ca bii buiyeerije to jeeñacājato, teerena tii bui cati, ñañaro cūja ca tii ecopere biro ñiro.

¹⁰ Cūja ca ñatipere biro ñiro, cūja cape macūri to yati nūcācoajato.

Cūja jōcūri cāa ca tūa mutīariquera to niicōa niijato,”
ñi. §

Judíos ca niitirā cūja ca ametuarije

¹¹ Mecūra o biro yu ñi jāiña: ¿Judíos, to birora tuo n̄n̄jeeticā yerijāa waarā cūja biijapari? Bitijacupa. Cūja ca bii ametuene n̄cārije juorira, judíos ca niitirā peere cūja ca ametuape nii eaupa, israelitas teere cūja ca uwa jeoro tiirugaro.

¹² Cūja ca bii ametuene n̄cārijera, niipetirāp̄ure cūja ca t̄goeña wajoaro tii, cūja ca junariquera judíos ca niitirāre cūja ca ametuaro to ca tiijata, ñucā cū yaarā cūja ca nii eajata docare, ametuenero añurije cūjare biirucu.

¹³ Mecūra, m̄ja judíos ca niitirāre yu ñi: M̄ja yu, añurije quetire wederi majure birora yu paderiquere n̄cū buorique mena yu tii,

¹⁴ ape tabera yu yaarā m̄jare ña peju cati, tuo n̄n̄jeema ñirā, jīcārā cūja ca ametuaro yu tiibocu ñima ñigu.

¹⁵ Cūre cūja ca junariquera, bojoca, ũm̄reco Pacu menare añuro cūja ca nii earo tiupa. ũm̄reco Pacu cūja ca tuo n̄n̄jee eajata, ca bii yairicarā cati tuarāre biro biirucuma.

¹⁶ Trigo weta buruare jīcā tabe, “ũm̄reco Pacu yee niirucu,” ñi ami dica woo juojata, niipetirop̄ura

añuri burua niipeticoa. “Yucugɯ nɯcō ʘmureco Pacɯ yaa nɯcō niirucu,” ñi ami dica woorique to ca niijata, ca dɯpɯri cãa jee dica wooriquerɯ tuacã.*

17 To biicãri yua, añuro petira jĩcã dɯpɯri paa taa cõa ecoupa. Mɯ pea olivogɯ macãnɯcũ macãgɯ nii pacagɯ, ape dɯpɯri watoare mɯ tuu ecoupa.† O biro biicãri, olivogɯ majuropeepɯre pɯto cati, tiigɯ ca cati niimore birora catiro jãña, mɯ bii eaupa.‡

18 To biri olivogɯ dɯpɯri majurope ametɯenero ca nii majuropeegɯre biro tɯgõeñaticãña. To biro mɯ ca ñijata, “Ca dɯpɯri méé ca nɯcõrre jɯo cati nii, ca nɯcõri pee yɯ ca cati niiro yɯre tii,” ñi majiña.

19 Ape tabera o biro mɯ ñicu: “Jĩcã dɯpɯrre paa jude cõaupi, yɯ peere tuu wajoarugɯ,” mɯ ñicu.

20 To birora bii. Cãja ca tɯo nɯnɯjeetirije jɯori paa jude cõa ecoupa. Mɯ pea díamacũ mɯ ca tɯo nɯcũ buorije jɯori tii tabere mɯ nii. To biri “O biro ca biigɯ yɯ nii,” ñitigɯra, ʘmureco Pacɯre ca ñi nɯcũ buogɯ niiña.

21 ʘmureco Pacɯa, cũ yaarã majurope cãare cũ ca ña boo pacatijata, mɯja cãare ña boo pacatirucumi.

22 ʘmureco Pacɯ cũ ca bojoca añurijere, ñucã ñañaro ca tiigɯ cũ ca niirijere, majiña. Cãre ca tɯo nɯnɯjeetiricarãre ñañaro ca tiigɯ nii, mɯja mena peera ca bojoca añugɯ nii, biimi. Cũ ca bojoca añurijere to birora mɯja ca tɯo nɯnɯjeecõa niitijata, mɯja cãa, mɯja paa taa cõa ecocoarucu.

* **11:16** Nɯcõ ca ñañarije maniri nɯcõ to ca nii eajata, ca dɯpɯri cãa ca ñañarije manirijera nii. † **11:17** Judíos ca niitirã, olivogɯ macãnɯcũ macãgɯ dɯpɯrre biro ca niirã peere tuu wajoagɯre biro tiipuri. ‡ **11:17** Judíos olivogɯ majuro peere biro ca niirãre ñi cõõñagɯ cũ ca ñirique nii.

23 Judíos, ca tɔo nɔnɔjeerɔgatirã cãja ca niirijere cãja ca yerijãajata, ñucã cū yaarã cãja ca niiro cãjare tiicãrucumi. Ɛmɔreco Pacɔa, paa taa cōarica dɔpɔre ca tuu queno majigɔ niimi.

24 Mɔja, macãnucū macãgɔ olivogɔ dɔpɔre paa taari, otericagɔ olivogɔpɔre, tiigɔ dɔpɔ niiti pacarã mɔja ca tuu ecojata, § judíos tiigɔ dɔpɔ majurope ca niirã doca, amaricarɔ maniro tiigɔ dɔpɔ ca niiro tii ecorucuma.

Israelitas cãja ca ametɔape

25 Yɔ yaarã, ate ca majiña maniriquere, “O biro ca biirã jãa nii” mɔja ca ñitipere biro ñigɔ, mɔja ca majiro yɔ boo. Israelitas jĩcãrã Ɛmɔreco Pacɔre tɔo nɔnɔjeetiupa. Ména to birora biicōa niirucuma, judíos ca niitirã, Ɛmɔreco Pacɔre cãja ca tɔo nɔnɔjee petiropɔ.

26 O biro cãja ca biiro, israelitas niipetirã ametɔene ecorucuma, o biro ñi owarique ca ni-irore birora:

“Bojocare ca ametɔenegɔ Sión* macū doorucumi, Jacob pãramerã ñañarije cãja ca tii niirijere cōa bojacãrucumi.

27 Ate niirucu cãja menare yɔ ca tiipe, cãja ca ñañarijere yɔ ca ametɔeneri tabere,”† ñi.

28 Añurije queti mena peera, israelitas, Ɛmɔreco Pacɔ waparã niima, mɔja pee añuro mɔja ca niipere ñirã. Beje jeericarã cãja ca niirije peera, Ɛmɔreco Pacɔ cū ca mairã niima, cãja ñicūarɔ cū ca jɔoricarã pãramerã niiri.

§ 11:24 Amaricarɔ maniro Ɛmɔreco Pacɔ yaarã nii eacãrucuma ñucã. * 11:26 Jerusalén. † 11:27 Is 59.20-21; 27.9; Jer 31.33-34.

29 Ƨmureco Pacua, cū ca tiicojorijera ěmatimi. Nūcā cū ca j̄oricarā niirique cāare wajoatimi.

30 J̄uguerop̄are m̄aja cāa, Ƨmureco Pacure ca t̄uo n̄n̄jeetirā m̄aja niip̄a. Mec̄ari peera israelitas c̄aja ca t̄uo n̄n̄jeetirije j̄ori, Ƨmureco Pacu cū ca ĩa mairā m̄aja nii ea.

31 To birora anija c̄are ca t̄uo n̄n̄jeetirā cāa, mec̄ara ĩa mai ecorucuma, Ƨmureco Pacu m̄ajare cū ca mairore birora.

32 Ƨmureco Pacu, niipetirāp̄arena ca t̄uo n̄n̄jeetirā c̄aja ca niiro tiip̄i, niipetirāp̄arena ĩa mair̄u.

33 ĩmureco Pacu yee añurije maquẽ ca niirije, cū yee majirique, t̄uo puorique, do biro ca tiiya manirije peti to niic̄ati! ĩNo c̄oro peti cū ca tiir̄garijere wede majio majiña mani, cū ca tiirijere t̄uo puoti, biirique to niiti!

34 ĩNiru pee Wiogu cū ca t̄ugoẽñarijere cū majiti? ĩNiru cū niipari, c̄are ca wede majioricu?‡

35 ĩNiru pee Ƨmureco Pacure apeye uno c̄are cū tiicojo j̄ojapari, jiro c̄are tuene ecor̄u?§

36 Niipetirije cū ca jeeñorique cū j̄orira nii, cū yeera nii, bi. ĩTo biri to birora c̄are mani baja peo n̄cū b̄oc̄a niico!

To biro to biijato.

12

Wāma catirique

1 To biri ȳa yaarā, Ƨmureco Pacu cū ca ĩa mairije j̄ori, m̄aja up̄r̄ire ca catirijerena c̄are tiicojo n̄cū b̄or̄are biro, ca ñañarije manirije, Ƨmureco Pacu cū

‡ 11:34 Is 40.13. § 11:35 Job 41.11.

ca ãa biijejarije, “Cũre tiicojo nũcũ buoya,” m̃jare yu ãi jã. * Ate nii díamacũra cũre tii nũcũ buorã peti m̃ja ca tiimiirije.

² Ati cuu macãrãre biro biiticãña. Biitirãra, m̃ja ca tũgoeñarijere wajoaya, m̃ja ca biirique cũti niirije ca wajoapere biro ãirã. O biro biirã, Æmũreco Pacũ cũ ca boorije añurije, ãa biijejarique, díamacũ ca niirijere, m̃ja majirucu.

³ Cũ ca añurije jũori, yũre cũ ca wede doti cojorique ca niiro macã, m̃ja niipetirãre: “Jĩcũ uno peera, cũ ca biirijere cũ ca tũgoeña niirijere, ametũeneropũ cũ tũgoeñaticãjato,” yu ãi. Biitirãra, díamacũ tũo nũcũ buorique jũori, tii maji niiriquere Æmũreco Pacũ m̃jare cũ ca tiicojorique ca niiro cõrora cũja tũgoeñajato.

⁴ Mani ca niiro cõrora jĩcã upũrena paũ taberi ca niiri upũ mani cũo. Bii pacaro tee niipetirijepũra jĩcã wãmera tiiti.

⁵ To birora mani cãa, paũ nii pacarã Jesucristo wadore jĩcã upũra mani nii ea. Mani ca niiro cõrora jĩcãri mena añuro mani ameri tii nemo.

⁶ Bojorica wãmeri wado tii majiriquere mani cũo, Æmũreco Pacũ manire cũ ca tiicojorũgaricarore birora. To biri jĩcũre, ca biipere wede jũguerique to ca niijata, díamacũ cũ ca tũo nũcũ buorore biro cũ wedejato.

⁷ Tii nemo majiriquere cũ ca tiicojo ecojata, añuro mena cũ tii nemojato. Bue majioriquere cũ ca tiicojo ecojata, cũ bue majiojato.

⁸ Aperãre cũja ca tũgoeña bayiro tii majiriquere cũ ca tiicojo ecojata, cũja ca tũgoeña bayiro cũ

* **12:1** “Æmũreco Pacũ cũ ca boorore biro pee niĩña,” m̃jare yu ãi.

tijjato. Ca boo pacarãre tii nemo majiriquere cã ca tiicojo ecojata, aũuro tũgoeñarique mena cã tiicojo-jato. Juo niiriquere cã ca tiicojo ecojata, aũuro cã juo nijjato. Īa boo pacariquere cã ca tiicojo ecojata, ujea niirique mena cã tijjato.

Mairique

⁹ Maja ca niiro cõrora mai ditoricaró maniro ameri mai niiña. Ñañarijere juna, aũurije peere tii nunujeeya.

¹⁰ Maja ca niiro cõrora jĩcã punare biro ameri mai niiña, nucũ buoriquere mena aũuro ameri ĩi nucũ buo niiri.

¹¹ Junañe bucurã niiticãña. To biro biitirãra, aũuro yeri cuticãri Wiogure to birora cãre tii nucũ buocõa niiña.

¹² Maja ca yue niirijere ĩirã, aũuro ujea niiña. Ñañaro tamuorã, tũgoeña bayi ametuene nucãcãña. Juu bue yerijãaticãña.

¹³ Jesucristore ca tuo nunujeerã cãja ca boo pacarijere cãjare tii nemoña. Maja puto ca earãre aũuro cãjare ñeeña.†

¹⁴ Ñañaro mujare ca tiiruga nunujeerãre, Umareco Pacu aũuro cãjare cã tijjato ĩirã, cãjare jãi juu bue bojaya. “Ñañaro maja biirucu,” ĩitirãra, “Aũuro mujare to biijato,” cãjare ĩiña.

¹⁵ Ca ujea niirã mena ujea niiña. Ca otirã menare otiya.

¹⁶ Jĩcã majare biro aũuro niirique cuti niiña. “Do biro ca tiiya manirã jãa nii,” ĩi tũgoeñatirãra, watoa macãrã cãja ca niirique cutirijere biro niiña. “Ca majirã jãa nii,” ĩi tũgoeñaticãña.

† 12:13 He 13.2; 1P 4.9.

17 Jĩcũ peerena, ñaňaro cũ ca tiiricarore birora, ñaňaro cũre tii ameticãña. Niipetirã cũja ca ĩa cojoro añurijere tiiruga niiña.

18 Tiirique unora to ca niijata, no mũaja ca tii bayiro cõro niipetirã mena añuro niiña.

19 Yũ yaarã, mũaja majuropeera ñaňaro tii ameticãña. Tiitirãra, “Umũreco Pacũ pee ñaňaro cũ tii amejato,” ĩicãña, owarique o biro ĩi: “Yũ yee nii ñaňaro tii amerique; yũ, yũ ame bojarucu,” ĩimi Umũreco Pacũ.‡

20 O biro ĩi:

“Mũre ca ĩa tutigu cũ ca aũa boajata, cũre baarique ecaya. Cũ ca oco jinirugajata cũare, cũre oco tĩaña.

To biro tiigu cũ ca biirique cutirijere buaro cũ ca bobo tugoeňaro mũ tiirucu,” ĩi.§

21 Ñaňarije pee mũre ca bii ametũa nũcãro tiiticãña. To biro biitigara, añurije mena pee ñaňarijere ca bii ametũa nũcãro tiiya.

13

Uparãre nũcũ buorique

1 Uparã cũja ca dotirijere niipetirã ca tii nunũjeepe nii. Doti maji niiriquea Umũreco Pacũ cũ ca tiicojorije nii. Uparã, Umũreco Pacũ cũ ca cũurã niima.

2 To biri uparãre ca ametũene nũcãgua, Umũreco Pacũ cũ ca dotirijere bii ametũene nũcãgu tiimi. To biro ca biirã, cũja majuropeera ñaňaro cũja ca biipere bii bui cutirã tiima.

‡ 12:19 Dt 32.35. § 12:20 Pr 25.21-22.

³ Ƴparã, añurije ca tii niirãre cãja ca uwi tũgoeñaro ca tiirã méé niima. Ñañarije ca tiirã peere biima. ¿Ƴparãre uwi tũgoeñaricaró maniro mũ niirũgati? Añurijere tii niĩña. To biro biĩgũ, añuro cãjare mũ ïi ecorucu.

⁴ Cũa, añuro mũ ca niipere ïigũ, Ƴmũreco Pacũ yũũ paderi majũ niimi. Ñañarije mũ ca tiijata docare, ca uwirũ mũ nii. Watoara ñañaro ca tiirã méé niima. Ƴmũreco Pacũ yeere paderi majũ niiri, ñañaro ca tiĩgũre, ajarique mena ñañaro ca tiipũ niigũ tiimi.

⁵ Tee jũori, Ƴparãre ca tũo nũnũjeepera niiro bii, bũari ñañaro cãja ca tiirijere tamũorũgatirã wado méé, tũgoeña niiriquepũ ca biirije jũori.

⁶ Teerena ïirã, niirique wapare mũja wapa tii.* Ƴparã, Ƴmũreco Pacũ yeere tiiri maja niima. Teera nii cãja ca tii niirije.

⁷ Mũja ca niiro cõrora mũja ca wapa moorijere wapa tiiya. Tii nemorique maquẽre wiogũre mũja ca wapa moojata, wapa tiiya. Niirique wapare mũja ca wapa moojata cãare wapa tiiya. Mũja ca nũcũ bũoparã cãja ca niiro macã, cãjare nũcũ bũoya. Cãja ca tiirije cãare ïa nũcũ bũoya.

⁸ Mũja ca ameri maitirije watoarena, jĩcũ ẽno mena peerena wapa mooticãña. Cũ pũto ca niĩgũre ca maĩgũa, doti cũuriquere tii peoticãmi.

⁹ Doti cũurique o biro ïi: “Nũmo cãti, manũ cãti, bii pacarã, tiĩ epericarã cãtiticãña; jĩaticãña; jee dutiticãña; ïa ẽgoticãña,” ïi.† Ate, to biri apeye doti cũurique ca niirije, ate wadorena nii ea: “Mũ pũto ca niĩgũre, mũ upũre mũ ca mairõre birõra maiña.”‡

* **13:6** Impuestos. † **13:9** Ex 20.13-15, 17; Dt 5.17-19, 21. ‡ **13:9** Lv 19.18.

¹⁰ Mairiquea, bojocare ñañoaro tiiti. Mairiquea, doti cūurique ca ñiire biro tii peoticã.

¹¹ Tee tiirã, mani ca niiri cuure majiri ate niipetirijere tii niiña. Mee, ca cãñirãre biro mani ca biirijere wãcãrica tabe niicoa. Mecãra, añurije quetire mani ca t̃o ññj̃ee j̃orica tabe menare mani ca amet̃ape cõñacã doo.

¹² Ñami ca niimijãrije boecoaro bii. To biri nait̃arop̃ niirãre biro mani ca tii niirucurijere tii yerijãari, ca boero beju catirique peere mani jee upaco.

¹³ Ëm̃arecore ca tii niirãre birora, bojoca catiri mani bii niico. Baa paca duwi yuju, cūmu cūa yuju, am̃a, nomia, tiirica wãme cõro méé tii epericarã cati, ñañarije tii jeyaariquere, j̃cãri cõro ca nii majiña manirijere, ña tutiriquere, ca tii niitiparã mani nii.

¹⁴ To biro biitirãra, Wiog̃ Jesucristore biro pee biiya, up̃, ñañarije tiirique ca boorijere tiiruga t̃goeñatirãra.

14

Díamacũ ca t̃o ñcũ b̃o bayitirã

¹ Díamacũ ca t̃o ñcũ b̃o bayitig̃are wede pairugarã méé añuro tii quenoña.

² J̃cãrãre, díamacũ c̃ja ca t̃o ñcũ b̃orije, niipetirije c̃jare baa doti. To biro ca bii pacaro niima, díamacũ ca t̃o ñcũ b̃o bayitirã, ote wado ca baarã.

³ Niipetirije ca baag̃a, niipetirije ca baatig̃a peere c̃ ña junaticãjato. Niipetirije ca baatig̃a pee cãa, niipetirije ca baag̃a peere c̃ wede paiticãjato. Mee, Ëm̃areco Pac̃a c̃ ca mairic̃a niimi.

4 ¿Maa ñiru mu niiti, apĩre ca pade coteɣure wede pairuɣu? Añuriye, ñañariye, cã ca tiijata cãare, cã wiogu majimi. Biiguma tũgoeña tutuacõa niirucumi. Wiogua, tũgoeña tutuacõa niiricaro ca tii majigu niimi.

5 Niima, jĩcã rumare ape rumari ametuenero, “Ca nii majuropeeri rumu nii,” ca ñirã. Niima ñucã, “Niipetiri rumaripara, jĩcã rumare birora biicã,” ca ñirã. Maja ca niiro cõro, maja ca tũgoeñari wãmere biro tii niĩña.

6 No ca niiri rumarena “Ca nii majuropeeri rumu nii” cã ca ñijata, Wiogure tii nacũ buogu tiimi. Ñucã ca ñitigu cãa, Wiogurena tii nacũ buogu tiimi. Niipetirije ca baagu cãa, Wiogure nacũ buogu tiimi. To biri Umareco Pacure, “Añu majuropecã” ñimi. Niipetirije ca baatigu cãa, Wiogure tii nacũ buogura tiimi. Cã cãa, Umareco Pacure, “Añu majuropecã” ñimi.

7 Jĩcã mani mena macũ uno peera cã yeere cati, ñucã cã yee majuro peere bii yai, biitimi.

8 Mani ca cati niijata, Wiogu jaarã mani nii. Ñucã bii yairã cãa, Wiogu jaarãra mani niicã. To biri cati niirã cãa, bii yairãru cãa, Wiogu jaarãra mani niicã.

9 Teere ñigra, bii yai, cati tua, biiupi Cristo, ca catirãre, ca bii yairicarã cãare, cãja Wiogu niiruɣu.

10 Maa, to docare, ¿Ñee tiigu mu yee wedegure mu wede paiti? ¿Ñee tiigu cãre mu ña junati? Mani niipetirãpara Umareco Pacu cã ca ña bejeri tabere mani ca eopera niiro bii.

11 O biro ñi owarique nii:

“Yu ca catirore birora biirucu,’ yu ñi,” ñimi Wiogu.

“Yu jüguerore niipetirã ãjuro jupeari mena ea nu-
urucuma.

Ñucã bojoca poogaari cõrora Æmureco Pacure baja
peo nucũ buorucuma,” ïi.*

¹² To biri mani ca niiro cõrora, niipetirije mani ca
tii niiriquere Æmureco Pacure mani wederucu.

¹³ To biri ca ameri wede paitiparã mani nii. To
biro ïitirãra, muja yee wedegu ñañaro cũ ca biiro
ca tiirijere tii buiyeeti, díamacũ cũ ca tuo nucũ
buorijere ca bii camotarijere tiiti, biiya.

¹⁴ Yu, Wiogu Jesús're ca tuo nunujeegure birora,
jĩcã wãme unora tee majuropeera ñañarije ca ni-
itirijere yu maji.† Jĩcã wãme unore, “Ñañarije nii,”
ca ïi tugoeñagura, to biirijera biicu, to biirije ca
tugoeñagu wadore.

¹⁵ Mu ca baarije jüorira, mu yee wedegu cũ ca
tugoeñarique paio mu ca tiijata, ameri mañrica
wãme méere tiigu mu tii. Mu ca baarije jüorira mu
yee wedegu, Cristo cũ ca bii yai bojaricu cũ ca yairo
tiiticãña.

¹⁶ Añurijere muja ca tiirijerena, ñañaro cãja ca
wede paio tiiticãña.‡

¹⁷ Æmureco Pacu cũ ca doti niirijea, baa, jini,
tiirique jüori méé bii. Añurije, añuro niirique, ujea
niirique, Añuri Yeri jüori bii niirique pee nii.

¹⁸ O biri wãme Jesucristore ca tii nunujeegua,
Æmureco Pacu cũ ca ïa biijejaro tii, bojoca cãare,
“Añugu niimi,” ïi eco, biimi.

* **14:11** Is 45.23. † **14:14** “Baariquea tee majuropeera ñañarije
niiti”. ‡ **14:16** Mu ca tugoeñajata peera, añurije ca niiro macã mu
ca tiirije jüorira mu yee wedegu Cristore ca tuo nunujeegua ñañarije
cã ca tiiro tiicãri, aperã ñañarije mujare cãja ca ïi wede paio tiieto.

19 Tee tiirã añuro niirique, añuro nii nɛnɛa waaricaró ca tiirije peere mani tii niico.

20 Baarique jɔrira, ʃmɛreco Pacɛ, ca ametɛaparã cɔja ca niiro cɔ ca tii niirijere ca yai nɛcãro tiiticãña. Baariquea, niipetirijepɛra añurije wado nii. Ñañarijea, mani ca baarije jɔrira aperãre ñañaro cɔja ca biiro mani ca tiirije pee nii.

21 Waibɛcɛ díire baati, ɛje ocore jiniti, mɛ yee wedegɛ ñañaro cɔ ca tiiro tii buiyeetirique pee añu.

22 Tee tiigɛ, díamacɔ mɛ ca tɔo nɛcɔ bɛo niirijere, mɛ, ʃmɛreco Pacɛ mena wadore bii niiña. ʃjea niimi, cɔ ca tii niirijere, cɔ ca tɔgoeña niirijepɛ, “To biro mɛ tii,” ca ñi ecotigɛ.

23 Cɔ ca baarijere tɔgoeñarique pairi ca baagɛa, tee jɔrira wapa tuami, díamacɔ cɔ ca tɔo nɛcɔ bɛorore biro tiitima ñigɛ. Niipetirije, díamacɔ tɔo nɛcɔ bɛoricarore biro ca tiya manirije, ñañarije nii.

15

Cristo cɔ ca biiricarore biro bii nɛnɛjeerique

1 Mani, ca tɔgoeña tutuarã, manire ca biijejarije peere tiirica tabe ɛnora, ca tɔgoeña tutuatirãre ca tii nemoparã mani nii.

2 Mani ca niiro cɔrora, mani pɛto macãrã cɔja ña biijejaro ca tiiparã mani nii, cɔja yee añurije, añuro cɔja ca nii nɛnɛa waaro tiirɛgarã.

3 Jesucristo cãa, cãre ca biijejarije wadore amaatiupi. O biro ñi owarique ca ñiroke birora: “Ñañarije ca ñi tutirã ñañarije mɛre cɔja ca ñi tutirije, yɛpɛ wadore ñaatuawɛ” ca ñiroke biro.*

* 15:3 Sal 69.9.

4 JꞱgueropꞱ cꞱja ca owarique niipetirijere, manire ca wede majiopere owaupa, tee, ca tꞱgoeña tutuarã manire ca tiirije jꞱori, mani ca yue niirijere pato wãcãricaro maniro mani ca yue niipere biro ïirã.

5 Æmureco PacꞱ, tꞱgoeña bayi, pato wãcãti, bi-iricaró ca tiigꞱ, jĩcãri mena añuro nii, Cristo cꞱ ca biiricarore biro mꞱja ca biiro cꞱ tiijato,

6 jĩcã peere biro yeri cuti, jĩcãri mena Æmureco PacꞱ, mani WiogꞱ Jesucristo PacꞱre baja peo, mꞱja ca tii nꞱcũ buopere biro ïigꞱ.

7 To biri mꞱja ca niiro cõro añura, añuro ameri tiiya, Æmureco PacꞱ añuro ïi nꞱcũ buoricꞱ cꞱ ca niipere ïigꞱ, Jesucristo añuro mꞱjare cꞱ ca tiiricarore birora.

8 Jesucristoa, judíos're pade coteri majꞱ niipꞱ, Æmureco PacꞱ cꞱ ca ïiire biro ca tiigꞱ cꞱ ca niirijere ïñori mani ñicãpꞱre, "To biro yꞱ tiirucu," cꞱ ca ïiriquere cꞱ ca ïiricarore birora to biijato ïigꞱ.

9 Ñucã judíos ca niitirã cãa Æmureco PacꞱ cꞱ ca ïa mairije jꞱori, cãre cꞱja ca baja nꞱcũ buopere biro ïigꞱ dooupi, o biro ïi owarique ca ïiire birora:

"Tee tiigꞱ judíos ca niitirã watoare mꞱre yꞱ ïi nꞱcũ buorucu.

MꞱ wãmere yꞱ baja peorucu."†

10 Ñucã ape tabe o biro ïi:

"Æmureco PacꞱ yaarã mena Ʇjea niña judíos ca niitirã."‡

11 Ñucã o biro ïi:

"Niipetirã bojoca poogaari, ÆpꞱre ïi nꞱcũ buoya. Bojoca cõrora ÆpꞱre baja peoya."§

† 15:9 2S 22.50; Sal 18.49. ‡ 15:10 Dt 32.43. § 15:11 Sal 117.1.

12 Isaías cãa o biro ñi owaupi:
 “Isaí yaa punare jĩcũ bañarucumi, niipetirã bojoca
 poogaarire ca jũo niipũ.
 Bojoca cõrora, ‘Manire ca ametuenerũ niimi,’ ñi
 yuerucuma,”* ñi.

13 Æmũreco Pacũ, yue niiricarõ ca tiigũ, mũaja,
 díamacũ cũre ca tũo nũcũ buorãre, ujea niirique,
 añuro niirique, mũajare cũ tiicojojato, Añuri Yeri cũ
 ca tutuarije jũori, nemo jañuro ca tũgoeña tutua
 yue niirã mũaja ca niipere biro ñigũ.

Pablo, judíos ca niitirãre añurije queti wederi majũ

14 Yũ yaarã, yũa díamacũra, “Ca bojoca añurã,
 niipetirije ca majirã, ca ameri wede majio majirã
 niima,” mũajare yũ ñi.

15 To biro mũaja ca bii pacaro jĩcã wãmeri mũajare
 ca dũjarije jũori, “Yũ ñicãre,” ñiri méé, díamacũ yũ ñi
 owa cojo, mũaja ca acobotipere biro ñigũ. Atere to
 biro yũ tii, Æmũreco Pacũ, cũ ca añu majuropeeri-
 jere cũ ca tiicojoricũ,

16 judíos ca niitirãre, añurijere boojãgu Cristo
 Jesús're pade bojari majũ cũ ca tiiricũ niiri. Pai
 niigũ yũ ca paderijea, Æmũreco Pacũ yee añurije
 quetire yũ ca wederije nii, judíos ca niitirãre Añuri
 Yeri, ca ñañarije manirã cũjare cũ ca tiirije jũori,
 Æmũreco Pacũre tiicojo nũcũ buorique cũ ca ña
 biijejarijere biro cũjare tiirũgu.

17 To biri yũra, Æmũreco Pacũ yeere yũ ca pade
 niirijea, Cristo Jesús jũori, “To biro ca biigũ yũ nii,”
 yũ ca ñirije nii.

18 Judíos ca niitirã Æmũreco Pacũre cũja ca tũo
 nunũjeero tiirũgu, Jesucristo yũre cũ ca tiirique ca

* 15:12 Is 11.10.

niitirijepura yu wedeti. To biri wederique, yu ca tii niirije mena,

19 ca bii ññorije, ca ña ñaaña manirije tii bau niirique, ca doti tutua niirije mena, ñucã Ñmureco Pacu yuu Añuri Yeri cã ca doti tutua niirije mena, yu tiiwu. O biro tiiri, Jerusalén mena Jesucristo yee añurije quetire wede juo waa, niipetiri taberipu wede, Iliria yeparu yu wede eacoawu.†

20 Yu ca tiirugarijea, Jesucristo yee añurije quetire ca tuo ñaatirãpüre yu ca wederugarije niiwu, aperã cãja ca wedericarãpürena yu ca wedetipere biro ñigu.

21 O biro owarique ca ñirore birora:
“Cũ yee maquëre cãja ca wederijere jĩcãti uno peera ca tuo ñaatiricã, cãre ñarucuma. Jĩcãti uno peera cã yee maquëre ca tuo ñaatiricã, tuo puorucuma.”‡

Romaru Pablo cã ca waape

22 Ate paderique, pañ tiiri mñjare yu ca ñagu waa majitiro yure bii camota niiwu.

23 Mecãra ati yeparire jĩcã tabe uno peera yu ca padepa tabe ca dñjatiro macã, pañ cãmari mñjare ca ñagu waaruga niirucuricu niiri,

24 España waagu mñjare yu ca ñagu waarugarije nii. Jĩcã cuu cõro mñjare ña bapa cãti, yu ca biiro jiro, yu ca waa nññu waaro yure mñja ca tii nemoro yu boo.

25 Mecãra Jerusalén pee, Jesucristore ca tuo nññjeerãre cãja ca tii nemorije wapa tiirica tiirire jee waagu yu waa ména.

† 15:19 Provincia romana al noroeste de Macedonia 2Ti 4.10.

‡ 15:21 Is 52.15.

26 Macedonia macãrã, Acaya macãri macãrã, cãja majuropeera, “Jerusalén macãrã Jesucristore ca t̃ho ñññjeerã ca boo pacarãre ca tii nemope niicu,” ïiri, teere neoupa.

27 Añuro tiirugarique mena tiupa. Biropua, to birora ca tiiparã cãja ca niirije niiro biiupa. Judíos ca niitirã, judíos yee añurije yeri tutuariquere cãja ca b̃ua earicarore birora, cãja cãa, apeye cãja ca c̃orije mena cãjare cãja ca tii nemopera niiro bii.

28 O biro atere tii yapano, ate wapa tiirica tiirire cãjare noni yapanori jiro, España waagu m̃jare ỹ ã ametua waarucu.

29 M̃jare ïagu waagu, “Cristo añurije cã ca tiirije niipetiro mena m̃jare ỹ earucu,” ỹ ïi maji.

30 Ỹ yaarã, mani Wiogu Jesucristo yee j̃ori, Añuri Yeri, ca mairã mani ca niiro cã ca tiirije j̃ori, “Ûm̃reco Pac̃re ỹre m̃ja ca juu bue bojarije mena ate ỹ ca tii niirijere ỹre tii nemoña,” m̃jare ỹ ïi.

31 Judea macãrã Jesucristore ca t̃ho ñññjeetirã, ñaño ỹre cãja ca tiirugarijere cã ca camotaapere jãina, ñucã Jesucristore ca t̃ho ñññjeerã, Jerusalén macãrãre cãja ca tii nemorijere ỹ ca jee waarijere añuro cãja ca ñeepe cãare jãi bojaya.

32 O biro m̃ja ca tiiro, Ûm̃reco Pac̃ cã ca boorije j̃ori, ujea niirique mena m̃jare ỹ bapa cati yerijãa niibocu.

33 Ûm̃reco Pac̃, añuro mani ca niiro ca tiigu, m̃ja niipetirã mena cã nijato. To biro to biijato.

16

Añu doti cojorique

¹ Mani yee wedego Febe, Cencrea macārã Jesucristore ca t̃uo ñññjeerãre ca tii nemogore, “Añuro cõre tiiya,” m̃jare ỹ ñi cojo.

² Wiog̃ wãme mena añuro cõre jãi bocaya, ca ñañarije manirã c̃ja ca tii yaarã c̃ti niitore biro tiiya. Ñucã niipetirije tii nemorique cõ ca boorijere cõre tii nemoña. Cõ pea paure tii nemo, ñucã ỹ cãare tii nemo, tiiwo.

³ Priscila, * Aquila, Cristo yeere ỹ ca pade bapa c̃tirãre añu dotiya.

⁴ C̃ja pea, “Cũre mani ca tii nemojata, mani cãare j̃ac̃rucuma,” ñi uwi t̃goeña pacarã ỹre tii nemowa. Ỹ, judíos ca niitirã Cristo Jesús're ca t̃uo ñññjeerã niipetirã, “Añu majuropecã,” c̃jare jãa ñi.

⁵ Ñucã to birora Priscila, Aquila yaa wiire ca nea poo juu buerã cãare añu dotiya. Ñucã ỹ yee wedeg̃ Epéneto Asia macã, Jesucristore ca t̃uo ñññjee j̃uoric̃ cãare añu dotiya.

⁶ M̃ja yee maquẽre ñigo, buaro ca paderico María cãare añu dotiya.

⁷ Ñucã ỹ yaarã tia c̃urica wiip̃, ỹ baparã ca niiricarã, Andrónico, Junias j̃aarire añu dotiya. C̃ja pea Jesucristo buerã watoare ca nii majuropeerã ca niiricarã, Jesucristore ỹ j̃guero ca t̃uo

* **16:3** Griego wederique mena peera Prisca. Ména j̃guerop̃ra Roma ca niiricarã Corinto macã pee tua dooupa, too c̃ja ca niiro Pablo c̃jare c̃ ca bua earica tabere (Hch 18.2). Jiro Éfesop̃ c̃ ca waaro Pablora bapa c̃ti waupa ñucã (Hch 18.18-19, 26). Ano peera yua Romap̃ niip̃ ñucã.

nunujee jhoricarã, niima.

8 Jesucristo jhori yu ca maigu Ampliato cãare añu dotiya.

9 Urbano, Jesucristo yeere jãare ca pade bapa cutigu, ñucã yu ca maigu Estaquis cãare añu dotiya.

10 Cã añujato Apeles, Jesucristore díamacũra díamacũ cã ca tuo nucũ bhoriere mani ca majiro ca tiiricu cãa.

Ñucã Aristóbulo yaa wii macãrã cãa cãja añujato.

11 Yu yee wedegu Herodiõn cãa cã añujato.

Ñucã Narciso yee wederã Jesucristore ca tuo nunujeerã cãa cãja añujato.

12 Mani Wiogu yee maquẽre bharo ca pade bojarurã romiri, Trifena, Trifosa, cãja añujato.

To biri apeo, yu yee wedego yu ca maigo, Pérsida, Wiogu yeere bharo ca paderucurico cãa, cõ añujato.

13 Rufo, Jesucristore ca tuo nunujeegu, ñucã cã paco, yu pacore biro ca niirico, cãja añujato.

14 Asíncrito, Flegonte, Hermes, Patrobas, Hermas, to biri mani jaarã cãja mena ca niirã cãa, cãja añujato.

15 Añu dotiya, Filólogo, Julia, Nereo, cã yee wedego Olimpás, niipetirã mani jaarã Cristore ca tuo nunujeerã cãja mena ca niirã cãare.

16 Ñucã to cãnacãrãphrena nucũ bhorique

mena añuro ameri añu dotiya.†
Niipetirã Jesucristore ca t̃o ññj̃eerã
m̃jare añu doti cojoma.

17 Ỹu yaarã, dica watiricaro tii, añurije queti m̃ja
ca wede ecoriquere ñi camota, ca tiirã menare ña
majiri niiña. C̃jare camotaticãña.

18 C̃ja, mani Wiogu Jesucristo yeere ca tiirã méé
niima. C̃ja majurope, c̃ja ca boorore biro c̃ja ca
tiirugarijere ca tiirã niima. To biri añuro t̃oricaro
añurije wede ditori, bojoca ca yeri t̃goeña tutu-
atirãre c̃jare ñi ditoma.

19 Niipetirã, añuro Jesucristo yee quetire m̃ja
ca t̃o ññj̃eerijere majima. To biro m̃ja ca
biirijere b̃aro ỹ ujea nii. Añurije maquẽre ca tii
majirã nii, ñañarije peera ca tii majitirã nii, m̃ja
ca biiro ỹ boo.

20 Yoari mééra, Ëm̃reco Pacu añuro mani ca
niiro ca tiigu, Satanás're m̃ja d̃pori docaru c̃re
uta abo c̃uc̃arucumi. Mani Wiogu Jesucristo c̃ ca
añurije m̃ja mena to niijato.

21 Ỹu paderique bapa Timoteo, ñucã ỹ yaarã,
Lucio, Jasón, Sosípater jãari cãa, m̃jare añu doti
cojoma.

22 Ỹu, Tercio ati p̃urore ca owagu, mani Wiogure
ca t̃o ññj̃eegu, m̃jare ỹ añu doti cojo.

23 Gayo cãa, m̃jare añu doti cojomi. Ỹu, niipetirã
ano macãrã Jesucristore ca t̃o ññj̃eerã, c̃ yaa

† 16:16 Wajopuare ñp̃riquea, tii ñc̃ b̃orã, t̃gm̃r̃ c̃ja ca tii
j̃o doorique niipura (1S 10.1; Hch 20.37). “Beso santo,” Jesucristore
ca t̃o ññj̃eerã c̃ja ca tii ñc̃ b̃orique c̃ti niirije niiro biipura
(1Co 16.20; 1P 5.14).

wiira jãa nea poo nii. Erasto, macã maquẽ wapa tiirica tiirire ca ãa n̄n̄n̄jee bojagu, mani yee wedegu Cuarto, m̄jare añu doti cojoma.

²⁴ Mani Wiogu Jesucristo cã ca añu majuropeerije m̄ja niipetirã mena to niijato. To biro to biijato.

Ɔm̄reco Pac̄re baja peo yapanorique

²⁵ Ɔm̄reco Pac̄re mani baja peoco, añurije queti Jesucristo yee maquẽ ȳ ca wederije ca ãirore biro añuro ca t̄goeña tutuarã m̄ja ca niiro ca tii majigure. Ɔm̄reco Pac̄ to birora ca niicõa niigu, ati yepa ca niiparo j̄guerop̄ra ca majiña maniriquere,

²⁶ mecãra, ca biipere wede j̄gueri maja cãja ca owa cūurique mena mani ca majiro tiimi. Ɔm̄reco Pac̄, “To biro ȳ tiirucu,” cã ca ãiricarore biro bojoca poogaari cõrora, díamacũ t̄o n̄n̄jee, tee ca ãirore biro tii n̄n̄jee, cãja ca tiipere biro ãigu cãja ca majiro tiimi.

²⁷ Ɔm̄reco Pac̄, j̄cãra ca niigu, ca majigure, Jesucristo j̄ori, “Ca añu majuropeeḡ niimi,” ãi n̄cũ b̄orique to niijato.

To biro to biijato.

Pablo

Umareco pacu wederique
The New Testament in the Waimaha language of
Columbia
El Nuevo Testamento en el idioma Waimaha de
Colombia

copyright © 2010 Wycliffe Bible Translators, Inc.

Language: Waimaja (Waimaha)

Translation by: Wycliffe Bible Translators, Inc.

Waimaha

Brazil

[bao]

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waimaha

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-20

PDF generated using Haiola and XeLaTeX on 18 Apr 2025 from source files dated 29 Jan 2022
b27487a1-9972-5a73-bd06-ca59527b1979